

CATO MAIOR 2 CHRISTIANVS.

SIVE
DE SENECTUTE
CHRISTIANA
LIBELLVS,

Ad amplissimum, & perquam
Reuerendum Dominum, Dom.
PHILIPPVM CAVEREL
Abbatem S. Vedasti.

Auctore P. IOANNE BOVRGHESIO
olim Duaci S. Theologiae Professore,
Societatis IESV.



DVACI,
Ex Typographia BALTAZARIS BELLERI,
sub Circino aureo, Anno 1633.



ADMODVM
REVERENDO IN CHRISTO
PATRI AC DOMINO
D. PHILIPPO CAVEREL,
CELEBERRIMI VEDASTINI
MONASTERII APVD ATREBATES
ARCHIMANDRITÆ.
RELIGIOSORVM, ORDINVM
ET
BONARVM ARTIVM
FAVTORI EXIMIO.

Annum dum agit vitæ LXXIX.
Administratę Pręlaturę xxxv.
Post extremę, & decrepitę
Senectutis annos feliciter
decurſos, beatam apprecatur
Æternitatem.

I. B. S. I.

M. DC. XXXIII.

APPROBATIO.

Opusculum hoc, cuius epigrapha est, *Cato Maior Christianus, siue de Senectute Christiana libellus*, Auctore P. Ioanne Bourghesia, olim Duaci S. Theologiae Professore, Societatis IESV, cum voluptate legi, dignumque censui quod prælo committeretur, atque ab omnibus legeretur; à senibus quidem, ut ætatis suæ bona, quæ doctè, eleganter, piè hic exponuntur, cognoscant, iisque Christianè utantur; à Iunioribus vero, ut cum puritate Latini sermonis, qua libellus iste commendabilis est, eas modò sibi artes virtutesque comparent, quarum suauissimos fructus olim in beata senectute decerpant. Duaci 8. Iunij 1633.

PHILIPPVS DV TRIEV
è Societate IESV S. Theolog.
Doctor, Episcopali auctoritate
Censor constitutus.



CATO MAIOR
CHRISTIANVS,
SIVE
DE CHRISTIANA
SENECTUTE, LIBELLVS.



UNQVAM satis laudari
dignè poterit Philoso-
phia, cui, qui pareat,
omne tempus ætatis si-
ne molestia possit dege-
re; quæ non modo om-
nes senectutis abstergat
molestias, sed efficiat
mollem etiam & iucun-
dam senectutem. Sed enim, quantum humanæ
rationi diuina fides antecellit, hoc quæ longè il-
lustrius est gratiæ lumen à Deo mentibus infu-
sum, quàm innatum inditumque naturæ: tan-
tum & amplius Christiana Philosophia Gen-
tilium omnium antecellit Philosophiam, et si
præstantibus ingenijs, & eloquentia sin-
gulari prædicatorum. Neque vero hæc cum illa
comparari potest, non secus atque cum luce
tenebræ, cum veritate falsitas, mendacium-
que componi nequit. Philosophia propa-
na,

na, mulier illa est captiua, quam si quis admauerit, decaluanda primùm est, errorum multiplici crine, vnguibusque resectis, emortuis criminum illecebris, & verborum fucis amputatis; tum Prophetali nitro sæpius abluenda; Denique, cum ad læuam humanæ rationis suppositam capiti dextera sua, er infusæ fidei, quâ te potissimùm astringat, accesserit, arctius complectenda. Multos sui fætus captiua dabit, & de Moabitide efficietur Israelitis.

Hieron. ad
Pamach.

2. de doctr.
Christian.

Philosophi, si quæ forte vera, & fidei nostræ accommodata dixerunt, ait Aug. non modo non sunt formidanda, sed ab ijs tanquam iniustis possessoribus vindicanda; & tanquam Ægypti spolia, in meliorem veri Dei cultum traducenda. Id ego nuper in Catone Maiore conatus sum, vt similem illi libellum, de Christiana senectute, conscriberem, delibatis aliquot eius sententijs, ex Christianæ fidei schola ac doctrina correctis, & leuiter immutatis; Eum libellum nunc ad te mitto, Reuerende admodum Præsul, plurimis mihi nominibus obseruande, ad aliquod tuæ non iam aduenientis, sed pridem vigentis senectutis, leuamen atque solatium; Quamquam non magnopere eges vlllo solatio, qui pro tua animi moderatione, & cum totus ex Deo pendeas, cum diuina voluntate conformatione; duo, quæ grauissimum putantur onera, senectutis, & inualetudinis, cum te subinde podagra diuexat, æquissimo feras animo: vt ijs prope delectari videaris. Neque dubito, quin tibi sæpè veniat in mentem, senectutem

em morbum esse naturalem, morbum verò duentitiam, & præmaturam esse senectutem; triusque autem originem in primæum primi parentis inobedientiæ peccatum referendam; quare moneri nos, diuino Numini parendum, & in eius æquissima, ac nobis maxime salutarì voluntate conquiescendum.

Ex ea scaturigine peccati manarunt omnes ruinæ nostræ; Mors imprimis, & senectus ræuia, ac prænuntia mortis, administra eius comes, nisi morbo, vel alio casu violento ræuertatur. In illo fælicis innocentie statu, eque mors, neque senectus, neque morbus, eque alia vitæ mortalis calamitas euenisset; ua nunc, vti flagro diuinæ iustitiæ multiplici cædimur mali serui; quemadmodum bseruat S. August. Tota vita mortalis plaga ostrea est, fratres mei, videte, ex quo vapulemus. In omnibus qui ab initio generis humani nati sunt, in omnibus qui nunc sunt, i omnibus qui postea nascentur, Adam vapulat. Vapulat Adam, id est, genus humanum. Et multi sic obduruerunt, vt nec plagas suas sentiant; Qui verò ex ipso genere lii facti sunt, receperunt sensum doloris, ntiunt se vapulare; & nouerunt quis iust vt vapulent; & leuauerunt oculos suos, ad um qui habitat in cælo, & sic sunt oculi orum in manibus Dei sui, quo ad vsque misereatur, & dicat aliquando, Parco, sitque æc extrema plaga, senectus patienter tolera- i; aut mors in eius obsequio p iè perfuncta. x eorum numero, qui se vapulare sentiunt, esse opinor, neque id vnquam, scio, ap-

Aug. in
ps. 122.

probabis responsi, quod Cato Maior Scipioni, ac Lelio admirantibus perfectam eius excellentemque sapientiam, in senectutis onere perferendo, dedit: Rem haud sane difficilem admirari videmini. Quibus enim nihil opis est in ipsis, ad bene beateque viuendum, ijs omnis grauis est ætas; Qui autem omnia bona à seipsis petunt, ijs nihil potest malum videri, quod nature necessitas adferat. Quo in genere imprimis est senectus, quam ut adipiscantur omnes optant, eandem accusant adepti. Nam quis humilitatis Christianę studiosus ab hoc superbo Stoicorum dogmate vehementer non abhorreat? Quis suæ virtuti tribuat, ut quę plerisque senibus sic odiosa est senectus, ut onus *Aethna* grauius dicant se sustinere ipsi sit minime grauis, sed grata etiam & expetenda? Site quidem noui, Reuerende Præsul, nihil in te opis ac præsidij, ad bene beateque viuendum agnoscis, non à te ipso, sed à Deo bonorum omnium authore petis vniuersa, gratissimoque semper animo *Dauidis* illos concinis versus, *Ego sum pauper & dolens, salus tua suscepit me. Deus docuisti me a iuventute mea, quam egens tui, quam ex me pauper ac miser essem! Et usque in senectam & senium non derelinquas me.* Et iterum. *Ego autem cantabo fortitudinem tuam: & exultabo mane misericordiam tuam: quia factus esceptor meus, & refugium meum in die tribulationis meę.* In grauelcentis huius ætatis. *Adiuuor meus tibi psallam, quia Deusceptor meus es: Deus meus misericordia mea.* O suauem nomen

Psa. 68.

v. 30.

Psa. 70.

v. 17.

v. 18.

Psa. 58.

v. 17.

v. 18.

nomen (exclamat S. Augustinus) sub quo nemini desperandum; etsi senectutis onus, Æthna grauius sustineat! Neque verò naturæ necessitatem in ætate prouecta (non enim omnibus etiam optantibus obtingit) sed diuinam indulgentiam, ac beneficentiam agnoscis; Et absit, vt eximium Dei munus accuses, aut malignè interpreteris, de quo quotidie Deo gratias rependis, cum recorderis, quam multos æquales tuos Deus ab ipsis prope carceribus, aut in medio cursu reuocarit à vita; tibi verò longiorem hanc ætatem ad maius obsequium suum, meritorumque tuorum ingentem cumulum, quo in beata perfruaris æternitate, tot inter morborum genera, prorogarit: Etenim ea est Diuina bonitas infinita, vt & ab ea inflicte pænæ sint gratiæ, ipsaque supplicia primæui peccati singularia quædam beneficia, & si norimus vti, consequendę beatæ æternitatis euadant adiumenta. Hunc porrò finem beatę æternitatis promerendę, atque assequendę, quò foret omnis ætas ac vita referenda, vetus ignorauit Philosophia. Neque mirum, si in cæteris vitæ partibus atque officijs describendis vehementer aberrarit, quæ in extremo totius vitæ fine constituendo, plane cæcutierit. Hic interim philosophiæ Christianæ cardo vertitur, hic vertex, hæc summa nostræ sapientię. Hominem à Deo conditum, Dei causa, vt eum agnoscat, obseruet, amet ac colat, ei que obediatur ac seruiatur hac in vita mortali, citissimè præteruolatura, tum perfectè saluus ac beatus fiat

in altera immortalī sempiterna. Duplex semper vita debet oculis fidei, ac mentis obuerfari; Præfens temporanea, in qua diuinorum obfequiorum, ac virtutum merita ſunt congerenda; tum altera futura ſempiterna, & immortalis, in qua præmia denique cæleſtia claræ beatificæque viſionis, ac fruitionis expectentur. Hic eſt vitæ ſcopus, huc omnium ætatum curſus, ac potiſſimum extremæ ſenectutis dirigendus. Cæteræ res omnes quæ hoc vniuerſo continentur, hominis cauſa conditæ ſunt, vt eum ad vltimi finis aſſequutionem adiuuent, atque promoueant, iſſque veluti vehiculis vtendum, ad vitæ huius curriculum ſæliciter emetiendum; aut quaſi ſcalis, quibus ad Deum conditorem, cæleſtemque eius aliquando regiam conſcendamus. Quamobrem, ſic animo comparati eſſe debemus, vt paupertatem æquè ac diuitias, ægritudinem æquè ac ſanitatem, breuem vitam æquè ac longam, mortem ipſam æquè ac vitam æſtimemus, ac pro magno Dei munere reputemus, ſi ad extremum æquè finem beatę vitę nos adiuuent. Nihil earum rerum per ſe in bonis malisque ducamus, quæ pro conditione naturæ ſuæ ſunt adiaphorę, ſed pro finis extremi ratione ſingulas quaſque dimetiamur, tumque ſenectus nobis optanda, atque in bonis habenda, ſi ad eum finem nos cumulatione virtute, ac merito perducatur; Si ab hoc aberraret fine, plane damnanda, ac repudianda. Melius illi erat, qui ab hoc exiit fine, ſi non modo ſenex, ſed ſi omnino natus non fuiſſet. Vtinam ille nullam æta-

tis vn-

tis vnquam, ac vitę partem attigisset!

Id serò iam experitur infelix Cato, qui videtur id vnum contendisse, ne senectus malum censeretur, ne misera & deploranda, sed molliter ferenda crederetur. At verò eius admiranda, & apud homines Christianos vere diuina bona, ac commoda non attigit: Sed audiamus eius sapientiam. In hoc sumus, inquit, Sapientes, quod naturam optimam ducem tanquam Deum sequimur, eique paremus, à quo non verisimile est, cum ceteræ partes etatis benedescriptæ sint, extremum ætatem tanquam ab inerti poeta esse neglectum. Sed tamen necesse fuit, esse aliquod extremum, & tanquam in arborum baccis, terræque frugibus, maturitate tempestiua quasi vietum, accaducum; quod ferendum est molliter sapienti. Quid enim est aliud gigantum more bellare cum Dijs, nisi naturæ repugnare? O cæcam ac miserandam Catonis sapientiam, qui nihil de originario vitio, ac communi labe naturæ cognorit humanæ! Hocne est gigantum more cum Deo bellare, naturæ corruptæ repugnare? an gratiæ, qua natura reparatur atque corrigitur? Naturam primi parentis peccato vitiatam, quæ se à Deo duce suo, ac conditore abstraxit, longissimæque abiecit in vitiorum omnium præcipitia, penarumque ac ærumnarum discrimina, tanquam ducem optimam sequamur? An non potius gratiam, quâ per Christum instaurata est natura, ac cum Deo, quem offenderat, in pristinam amicitiam, ac beneuolentiam restituta, cuius ope ac beneficio,

ficio, quas iuste promeriti eramus pœnas, ac miseras, in magna meritorum lucra, gratiæque ac gloriæ cœlestis incrementa conuertere licet? Si quo primum in statu condita est natura, iustitiæ atque innocentie permanisset, adhærens Deo libique concors, ac pacata, cum corpus animo, animus Deo pareret, cum pars inferior superiori ad eius omne parata subesset obsequium, nec reluctaretur; tum illa forte dux ad Deum, adiuta diuinitus esse potuisset. At modo rebellis Deo, secumque pugnans, ac discors, cum nec ratio Deo, nec rationi pars inferior obtemperat, qui possit esse Dux, ac Magistra vitæ? Sanè mortem Deus non fecit, nec senectutem, quam rectè quispiam longam & lentam mortem dixerit, nec cæteras ærumnas in hanc vitam mortalem inuexit, sed peccando sibi, suæque stirpi, primus parens arcessiuit. *Homo cum in honore esset non intellexit, comparatus est inmentis insipientibus, & similis factus est illis.* Valde diuersi, libique repugnantes sunt motus atque impetus Naturæ, & Gratia. Non est illa à Deo iam distracta, dux optima, quæ semetipsam semper quærit, in se hæret, ac quiescit, amantissima sui semper, eoque amore excæcata turpiter ac infelicitè. Dux nobis ad Deum principium, ac finem nostrum, summum vnicumque bonum optima, gratia est, naturæ instauratrix, quæ cum cæteras ætates, tum præcipuè senectutem diuinæ illustrationis, & inspirationis immisisit è cælo velut radijs illustret, accendat, inflammet, ad Deum trahat, atque annectat, quæ nos

rerum

Psal. 43.
v. 13.

rerum omnium terrenarum ac sæculi huius expoliatos amore, in Deum transferat, eiusque ynius amoris flammis incensos in diuinam eius transformet speciem, ac charitatem.

Fabula sit humana vita. Sed ex diuina imprimis ope, quæ nunquam deest, tum ex nostro quoque Deus arbitrio pendere voluit, comœdiane esset, an Tragedia: exitu læto an tristi, sælician longe omnium luctuosissimo. Etenim omnis hæc præsens vita mortalis ad alteram immortalem mox consequuturam est referenda. Cum Deus hominem gloriæ suæ causa condiderit, hominisque salus ad Dei gloriam maxime pertineat, ita constituit, vt qui Deo conditori detulisset obsequium fidei, spei, charitatis, religionis, obseruantix præceptorum, in hac breuissima vita: translatus mox in alteram sempiternam, illo perfrueretur, ac cælesti donatus præmio ac regno; beatus efficeretur; Qui verò Dei sui legem ac præcepta neglexisset, ac sese vitijs contaminasset, in Tartarum, atque infernum diuinæ iustitiæ carcerem perpetuò cruciandus detruderetur. Ergo futuræ nos æternitati probamus, comparamus; sementem hic facimus meritorum; vt illic messem præmiorum coligamus; hic militamus, illic triumphabimus; hic currimus, illic brauium ac coronam assequemur; ac quam perfectè hic Deo famulati fuerimus, tam illic eodem perfectè perfruemur, quæ eius maior est gloria cum nostra salute semper, ac perfectione coniuncta. Pro mensura gratiæ, hic bonis
operibus

operibus comparatæ, Dei clarę visionis illic, & glorię merces ex æquo respondebit. Qualis omnino vita hæc præsens in Dei obsequio traducta desierit; talis inchoabitur immortalis altera, in Dei fruitione ac præmio representanda. Hoc enim illud est in humana vita velut extremum, quod ad æternitatis beatæ fructum demetendum sit idoneum, ut in arborum baccis, terræque frugibus, maturitate tempestiva quasi victum, & caducum. Id quibusdam in prima verni temporis suavitate; alijs, in æstatis & autumnii velut cursu proeclatior, cæteris in brumali senectutis asperitate, contingit. Sed hoc interest, quod qui longius ætatem in Dei cultu ac famulatu produxerit, eo maiorem fructuum copiam, vberioreque bonorum operum segetem aggregarit. Quare Deo senectutis largitori magna habenda est gratia, neque molliter illa ferenda est, sed fortiter, sed constanter, sed feruenter alacriterque obeunda, velut in calceiam ac meta curriculi versantibus, velut in aditu atque ingressu cælestis regni prope constitutis. Cumque cæteræ partes ætatis, opitulante Deo, bene sint descriptæ, ac decursæ, elaborandum nobis est, ne senectutis extremum actum, velut inertes poëtæ neglexisse videamur; ne veluti longa emensa nauigatione, in ipsis optati portus faucibus naufragium faciamus. Precandus Deus, psalmistæ voce, *Deus docuisti me à iuuenute mea, & usque nunc pronuntiabo mirabilia tua; & usque in senectam & senium Deus ne derelinquas me, & supra*

Ne

Ne proyicias me in tempore senectutis, cum defecerit virtus mea, ne derelinquas me.

Regrediamur ad Catonem. Aptissima omnino sunt arma senectutis, artes, exercitationesque virtutum, quæ in ætate cultæ, cum multum diuque vixeris, mirificos adferunt fructus; non solum, quia nunquam deserunt, nec in extremo quidem tempore ætatis: quanquam id maximum est; verum etiam, quia conscientia bene actæ vitæ, multorumque benefactorum recordatio iucundissima est. At magnopere verendum, ne superbiæ labem adspergat ea recordatio, ne velut immisso arrogantia toxico, præteritorum benefactorum laudem inficiat, mercedemque conuellat. Et quæ potest esse bene actæ vitæ conscientia, nisi Deo nitatur, nisi à Deo oriatur, in Dei cultum, & honorem referatur? Quæ possunt esse virtutes, quæ non à Deo velut prima origine dimanent, in Deumque velut vltimum scopum reuocentur? Itaque qui gloriatur, in Domino gloriatur, qui lætatur non in se ipso, sed in Domino lætatur. Nam tametsi ipsa per se virtutum honestas, ac species expeti posse videatur; tamen extremus omnino finis suis ipsius virtus esse non potest. Vt à Deo procedit, sic in Deum tendere debet omnis virtus, cuius ille fons est & merces, author idemque remunerator. Id honestum, id pulchrum est, id rectæ rationi congruens, cum se Deo conditori subdit homo, eiusque obsequio, ac gloriæ omnes suas artes, atque exercitationes virtutum transcribit, à quo felicitatis

æternæ

æternæ mercedem amplissimam est adepturus. Non deserunt eæ virtutum exercitationes, ne quidem in extremo tempore ætatis, nam tum vel maxime se exerunt, atque augescunt; sed non id maximum est: quid enim magnum quod brevis huius vitæ limitibus angustissimis coarctetur? Sed maximum est, quod ad beatam æternitatem promerendam, atque assequendam plurimum conferant, quod nec in ipsâ morte, nec à morte iam obitâ deserant. Inter omnes autem artes, suprèma est, ars ex Christianis institutis bene viuendi, ac moriendi, ars bene se ad mortem comparandi, cuius potissimum vsus in senectute.

Virtutum Principes, Fides, Spes, Charitas, Religio, Pietas, obseruantia, ac gratitudo, aduersus Deum; erga proximum iustitia, & misericordia, charitatis beneuolentia, ac beneficentia; erga seipsum continentia, pænitentia, humilitas, & aliæ quarum ne vocabula quidem nota priscis Philosophis. Ac quemadmodum duæ sunt partes iustitiæ Christianæ, vna quâ declinamus malum, altera qua bonum præstamus, odientes malum, adhærentes bono; sic mihi duplici potissimum parte constare videtur omnis exercitatio virtutum, quæ in spiritali Christiana vita sit excolenda, Mortificatione, & Oratione; vt expurgatus animus, atque illustratus, Deo suo plenius, firmitusque adhærescat. Hæ profectus nostri spiritalis sunt artes, quibus expugnata sensuum, carnis, ac inferioris naturæ rebellione, ipsius quoque propriæ

propriæ voluntatis, ac iudicij cuius sumus omnes amantissimi, ac retinentissimi, studium omne conferamus in augenda Dei conditoris nostri cognitione, ac charitate sanctissima; quibus artibus, ac studijs ampliores quotidie progressus in amando, & cognoscendo Deo, supremo bono nostro, faciamus; futuram quodammodo beatitudinem æmulatione proxima prægustantes, & præoccupantes, Dei ipsius, ac Beatorum vitam cælestem, cum eius gratia, quoad huius vitæ mortalis conditio patitur, imitantes atque inchoantes.

Ad superiores partes ætatis, maximè pertinet mortificatio, sensuumque, & iudicij, ac propriæ voluntatis expugnatio. Ad extremam senectutem, oratio, diuinaque charitate penitus incensa contemplatio; quæ sane virtutes in ætate cultę mirificos adferunt fructus, quos in senectute, adeoque à morte, & in omni decerpas ac demetas æternitate. Sed hæc in mentem Catoni venire non potuerunt. Hæc igitur aptissima sunt arma senectutis, contemplatio rerum diuinarum, ac cum Deo cælestibusque familiaris consuetudo, frequens oratio, Sacramentorum, Pænitentię præsertim, & Eucharistiæ cum curâ, & sensu pietatis; usurpatio. Et sane quod senectuti præstantius esse queat viaticum, atque præsidium, quam Diuina Eucharistia, qua bonorum omnium copïa atque affluentia continetur? Quem pæniteat multum diuque viuere, si potest hoc omni die diuinum usurpare mysterium, si salutarem hostiam quotidie offerat eternæ Trinitati, si spiritali fame pressus, Angelorum
hac

hac lautissima mensa reficiatur? Nempe hoc illud est nectar immortalitatis, hæc diuina ambrosia, qua iuuentus animi renouetur, & senectus omnis ac vetustas expellatur. *Introibo ad altare Dei, ad Deum qui renouat iuuentutem meam.*

Pf. 42. v. 4.

in Pf. 145.

9. conf. 4.

Ep. 4.

Amplissima sunt arma senectutis, diuinæ litterę, velut à Patre cælitus missæ ad exules, ac peregrinos, ne nos patrię cælestis obliuio capiat, è quibus, quid à nobis ipse requirat cælestis Pater; omnino discamus; quas iure merito S. Augustinus delitias, ac diuitias spiritus appellat; diuitias, ob plenitudinem, & copiam bonorum omnium, quibus instrui mur atque erudimur ad omnem virtutem; delitias, ob incredibilem, quæ in eis latet, dulcedinem, eaque de causa vocat eas alibi de cæli melle melleas, & de Dei lumine luminosas.

Pf. 11. v. 7.

Pf. 18. v. 13

Eloquia Domini eloquia casta, argentum igne examinatum, probatum terra purgatum septuplum. Desiderabilia super aurum & lapidem pretiosum multum, dulciora super mel & faxum. Sed ne longius à Catone digrediamur. Etenim cum complector animo, quatuor causas reperiō, cur senectus misera videatur; vnā, quod auocet à rebus gerendis; alterā, quod corpus faciat infirmum; tertiam, quod priuet omnibus fere voluptatibus; quartā quod haud procul absit à morte: Earum si placet causarum, quanta, quamque sit iusta vnaquæque, videamus. Homini Christiano earum quæque, singularis quædam senectutis prærogatiua, & supra cæteras ætates præcellentia, videbitur: si quemadmodum debet; **animi**

animi sui potioſorem ſemper, quam corporis rationem ducat. Philoſophorum hoc erat fere dogma: Quemque animo hominem eſſe, non corpore, hoc hominis indumentum atque integumentum quoddam eſſe; negligendum, aut non magnopere percurandum. Quam in ſententiam Socrates rogatus à Critone, Tufcul. 14 quemadmodum ſepeliri vellet. Multam verò inquit, operam, amici, fruſtra conſumpſi: Critoni enim noſtro non perſuaſi, me hinc auolaturum, neque quicquam mei relicturum. Verumtamen Crito ſi me aſſequi poteris, aut ſicubi nactus eris, vt tibi videbitur, ſepelito. Sed mihi crede nemo me veſtrum cum hinc exceſſero, conſequetur. Percelebris & illa vulgata vox Anaxarchi, qui cum tempeſtate delatus in Cyprum à Nicocreonte Tyranno iuſſus eſt in mortarium conijci, ac ferreis piſtillis contundi; ſed infractus, aut verius animo tumens; Tunde, ait, Anaxarchi manticam, nam Anaxarchum non percutis. Laer. 9.
c. 10. Eſt ita ſanè, animo conſtamus, & corpore; animus pars longè eſt præcipua, ac potiſſima, cuius propriæ quædam ſunt facultates, & functiones ſpirituales, corporis expertes, ab exteris ſenſibus minimè dependentes. Corpus pars deterior, ex pugnantibus humoribus, atque elementis compoſitum; quod ſua ſponte marceſcit, atque ad interitum tendit, cuius organa, & vires omnes ipſo temporis proceſſu ſenſim imminuuntur, atque exhauriuntur. De quo rectè accipias, Ep. 9. quod eſt apud Senecam: Meliora præteruolant, deteriora ſuccedunt. Quemadmodum

ex amphora primum quod sincerissimum est effluit, grauissimum quodque, turbidumque subsidit; sic in etate nostra quod est optimum, primum est, id exhauriri in alijs potius patimur, vt nobis facem reseruemus. Inhereat istud animo, & tanquam missum oraculo placeat. Optima quęque dies miseris mortalibus æui Prima fugit. Si corpus spectes, Senectutem, ætatis hyemem, vt extremam, ita vitę partem deterrimam dixeris. Sed si spectes animum; eius portio superior, quę mens est, intelligendi vis, & res spirituales celestesque appetendi, si qua alia in ætate, in senectute præcipue viget, atque efflorescit, præsertim si fide Christiana, ac Diuina luce sapientię cælitus collustretur. Quin verò & Seneca ausus est profiteri: Non sentio in animo etatis iniuriam, cum sentiam in corpore, tantum vitia & vitiorum ministeria senescunt, viget animus, & gaudet, non multum sibi esse cum corpore, magnam partem oneris sui deposuit, exultat, & mihi facit controuersiam de senectute, hunc ait esse florem suum, credamus illi, bono suo vtatur. At quantò id verius dixerit Senex Christianus, diuinā sapientia perfruens, corpore pridem mortificationis iugo prorsus edomito, ac compresso; Animo autem contemplationis, atque orationis diuinis radijs illustrato!

Senec.
ep. 26.

1. Reg. 1.

Dauid annos natus septuaginta, bellicosus quondam vir, senectute frigescens, non poterat calefieri; queritur itaque puella de vniuersis finibus Israel, Abisag Sunamitis, quę cum Rege dormiret, & senile corpus calefaceret.

ceret. Nonne tibi videtur, si occidentem sequaris litteram, vel figmentum esse de mimo, vel Atellanarum ludicra. Exponat sapientissimus Salomon Patris sui delitias, & pacificus bellatoris viri narret amplexus. Posside Sapientiā, posside intelligentiā. Ne obliuiscaris, & ne declinaueris à verbis oris mei. Neque derelinquas illam, & apprehendet te: ama illam, & seruabit te. Principiū Sapiētiæ, posside sapientiā: & in ōni possessione tua, posside intelligentiā, circūda illā, & exaltabit te: honora illam, & amplexabitur te. vt det capiti tuo coronam gratiarū. Corona quoq; delitiarū proteget te. Omnes pænē virtutes corporis mutantur in senibus, & crescente sola sapiētia, decrescunt cetera, ieiunia, vigiliæ, & eleemosynæ, chameuniæ, huc illucque discursus, peregrinorū susceptio, defensio pauperum, instantia orationum, perseuerantia, visitatio languentium, labor manuum, vnde præbeantur eleemosynæ; & ne sermonem longius protraham, cuncta, quæ per corpus exercentur, fracto corpore minora fiunt. Nec hoc dico, quod in iuuenibus, & adhuc solidioris ætatis, his dumtaxat, qui labore & ardentissimo studio, vitæ quoque sanctimonia, & orationis ad Dominum Iesum frequentia, scientiam consequuti sunt, frigeat sapientia, quæ in plærisque senibus ætate marcescit; sed quod adolescentia multa corporis bella sustineat, & inter incentiua vitiorum, & carnis titillationes, quasi ignis in lignis viridibus suffocetur, vt suum non possit explicare fulgorem. Senectus verò rursus eorum, qui adolescentiam suam honestis artibus instruxe-

Hiero. ad
Nepotia-
num.

Prou. 4.

runt, & in lege Domini meditati sunt die ac nocte, ætate fit doctior, usu tritior, processu temporis sapientior, & veterum studiorum dulcissimos fructus metit. Hæc, aliaque Hierony. quide se sene, cano iam capite, & arata rugis fronte, & instar boum pendentibus à miento palaribus, cui frigidus obsistit circum præcordia sanguis &c. Amplexetur me, inquit, modò Sapientia, & Abisag nostra, quæ nunquam senescit, in meo requiescat sinu. Impolluta est, virginitatisque perpetuæ, & quæ in similitudinem Mariæ, cum quotidie generet, semperque pariat, incorrupta est. Ex hoc igitur vno complexu Sapientiæ quæ n-tum senectus cæteris ætatibus antecellat, apertum est, ex eoque vno capite deduci potest haud obscure, quam vnaqueque rationum earum, quas protulit Cato, non modò nulla vituperatio, sed eximia quædam sit laus, & commendatio senectutis. Auocat à rebus gerendis, quæ corpore administrantur, ac viribus, non quæ geruntur animo: corpus facit infirmum, sed animum valentem & sanum; priuat voluptatibus corporis, sed animi delitijs cumulat impensius: haud procul abest à morte, quæ dissolutio est à vinculis corporis, & ab ergastulo miseræ vitæ mortalis optatissima liberatio; Inde senectus gratior, quò morti propinquior, quæ velut è longa nauigatione terram adspicit, & multis iactata tempestatibus, denique in tranquillum salutis, ac beatæ portum æternitatis inuehitur. A rebus gerendis abstrahit senectus. Quibus? An ijs, quæ iuuentute geruntur, & viribus? Nullæ igitur

igitur res seniles sunt, quæ vel infirmis corporibus, animo tamen administrentur? Nihilne agebant Apostolorum Principes, Petrus & Paulus, cæterique primi fidei nostræ satores & fundatores Ecclesiæ, dum per vniuersum orbem Euangelij lucem inferebant, dum quamplurimis terra marique susceptis peregrinationibus, laboribusque exantlatis innumeras nationes, locis disiunctissimas, ingenijs diuersissimas ac moribus propemodum efferratas, peragrarunt, & ad Ecclesiæ caulas perduxerunt? *In omnem terram exiit sonus eorum*, Psalm. 18. v. 5.
& in fines orbis terra verba eorum. Seniore se Petrus gloriatur, atque ab ætate auctoritatem sibi conciliat; *Seniores ergo, qui in vobis sunt, obsecro, consenior & testis Christi passionum: qui & eius, quæ in futuro reuelanda est, gloria communicator*. Paulus quoque Philemoni, cum posset imperare, pro Onesimo seruo fugitiuo, supplex; *Propter charitatem magis obsecro*, ait, *cum sis talis, ut Paulus senex, nunc autem & vincetus Jesu Christi*. 1. Petri 5. v. 1.

Nihilne agebat, quam honoris causâ primo oportuit loco nominari, vt omnium ætatum, ita senectutis eximia Princeps ac Patrona, Virgo Deipara, quæ annū ætatis septuagesimum primum, aut septuagesimum secundum, à Christi filij in cælos ascensu vigesimum tertium attigit, adeoque expleuit: dum Apostolorum Magistra, Martyrum exhortatrix, Confessorum ac Virginum exemplar, ac præsidium singulare; omnium primitiuorum fidelium Mater ac nutrix extitit amantissima, custosque fidissima; nihilne contulit

opis Ecclesiæ nascenti? Nihil profuit assiduus apud Deum filium precibus, ac in dies cumulatior semper mensurâ meritis augescentibus; apud fideles exemplis, monitionibus, ac cohortationibus, ab incensissimâ charitate profectis? Ac, ut de cæteris taceam, Ioannes Senior; Sic enim se appellat, cum Electæ Domine, & Cajo discipulo scribit, utrique, & filio & Matri percharus discipulus, qui totas Asiæ fundavit ac rexit Ecclesias, ac novissimus Evangelium scripsit, ad Christi maximè confirmandam Deitatem, intonans illud; *In Principio erat Verbum, &c.* Quod obtupescant, nec assequantur unquam Platonici; tum relegatus in Insulam Patmos Apocalypsim infinita futurorum mysteria, tot scita, quot verba continentem adiecit; an otiosam & inertem traduxit senectutem, sexagesimo demum post Christi passionem anno defunctus?

Ex com.
Hiero. in
ep. ad Gal.
l. 3. c. 6.

Cum Ephesi moraretur, & vix inter discipulorum manus ad Ecclesiam deferretur, nec posset in plura verba vocem contexere, nihil aliud per singulas solebat proferre collectas, nisi hoc; Filioli, diligite alterutrum. Tandem discipuli, & fratres qui aderant, tædio affecti, quod eadem semper audirent, dixerunt: Magister, quare hoc semper loqueris? qui respondit dignam Ioanne sententiam: Quia præceptum Domini est, & si solum fiat, sufficit. O præclaram, & breuem grandævum cuiusque senis orationem; diligite alterutrum, diligamus inuicem! Metuebat Cato, ne orator senectute languesceret, Etenim munus, id est,

non

non ingenij tantum, sed laterum etiam & virium; At, si non in publicis, in priuatis certe congressibus senex iam amissâ voce, ad mutuam fraternamque charitatem cohortari potest, exempla prioris ætatis, & ad omnem virtutem documenta proferre potest; Scribendo certe posteritati prodesse potest. D. Lucas Evangelista, Medicus Antiochensis, Græci sermonis peritissimus, vt à S. Paulo ac cæteris Apostolis didicerat, Euangelium scripsit, & acta Apostolorum vsque ad biennium Pauli Romæ commorantis, quem si Medicum memineris, ait Hieronymus, aduerteres omnia verba illius animæ languentis esse medicinam. Duos sanè scripsit medicos libros plenissimos documentorum & exemplorum, quibus ægrè percurentur animæ, & sanæ corroborentur. Vixit cælebs annos octoginta quatuor, quæ prouectæ senectutis vltima meta propemodum esse solet.

Ac quemadmodum primis humani generis progenitoribus, ac propagatoribus, eo fine longiora vitæ spatia prorogata sunt, sic Apostolis, Apostolicisque viris ad Euangelicam fidem toto orbe disseminandam, Ecclesiamque fundandam prouectior ætas, ac senectus indulta est. Quam multos commemorare possum Ecclesiarum Antistites grandæuos senes, aut Religiosarum familiarum Fundatores ac moderatores, qui ab earum curâ, ac prouidentissimâ, subditis maximè salutari administratione, per vltimam ætatem, ac senectutem nihil sunt impediti; imò, cum per eam rerum vsus, ac prudentia, authoritasque accederet,

B 4

pluri-

plurimum sunt adiuti?

Nec dissita nobis, aut externa petenda sunt exempla, cum ad te oculos obuertimus, Amplissime Præsul, qui hac ætate non vnus modò celebratissimi Monasterij Sancti Vedasti, sed cæterorum omnium exemptorum in Belgio, ac Sanctissimæ Sedi Apostolicæ proximè subiectorum summam Præfecturam geris summâ omnium Religiosorum approbatione, atque vtilitate spiritali. Possem hîc, nisi me meus pudor, & tua etiam magis inhiheret modestia singularis, res tuas præclarè gestas commemorare, quibus tuam hanc extremam senectutem non inertem atque otiosam, sed priuatis, publicisque grauissimis occupatam negotijs, ijs explicandis, & ad optatum perducendis exitum parem atque idoneam maximè demonstraſti. Quòd Vedastina familia tua optimis ad omnem virtutem stabilita sit institutis, abundetque Religiosis omni, non modò doctrinæ, verùm & sanctitatis laude florentibus, tuæ potissimum curæ, industriæ, diligentie, & prudentiæ senili est adscribendum. Liberalitatem quoque senilem, ac munificentiam prædicabunt exstructa, ac fundata Collegia, Vedastinum Duacense, & Atrebatense Societatis Iesv, commodissimis ædibus vtrumque, & verè Regiâ instructum Basilicâ.

Iam quod afflictissimæ Patriæ nostræ Belgicę defuisti nunquam in Orthodoxâ Religione, & fide, quam debet Regi suo tuendâ; Quod omni eam ope subleuasti, confirmaſti, recreaſti; Quod operâ, consilio, providentiâ, rebus in omnibus dubijs adfuiſti triginta iam
& amplius

& amplius annos Illustrium Arthesiæ Ordinum Princeps ac primus delegatus, quas ob res Consilij sui priuati Præsidem te non semel designarat Serenissimus Albertus, nisi religiosam quietem, ac solitudinem anteposuis-
 ses; Quod septimum iam mensem in Batavorum animis conciliandis, pace vel inducijs firmandis incredibili animi magnitudine, constantiâ, prudentiâ, dexteritate vires omnes tuæ laudatissimæ senectutis impendis; Quod ab tuis abesse te tamdiu pateris, totque molestissimos exhauris labores vnus boni publici causâ, nulla vnquam posterorum conticescet ætas. Sed has ego laudes inuoluo silentio, quod te his magis flagellari, ac cruciari, quam delectari sciam. Alia igitur exempla producamus.

Cùm mortem iam proximam operiente S. Ambrosio, de futuro successore clam inter se susurrarent Clerici, ac Simpliciani, sed valde senis meminissent, exclamauit Ambrosius moriens; Senex, sed bonus: impedimento senectutem esse non debere demonstrans. Idem Ambrosius: Quid naturam accusas, ô homo? Habet illa velut impedimenta quædam senectutem & infirmitatem, sed senectus ipsa in bonis moribus dulcior, in consilijs subtilior, ad constantiam subeundæ mortis potior, ad reprimendas libidines fortior, infirmitas corporis sobrietas mentis est. Quis vel vnus Athanasij, Patriarchæ Alexandr. diuinam prudentiam, constantiam, patientiam, fortitudinem, perseuerantiam dignè deprædicet, qui summo Ecclesiæ bono, tot
 inter

1. Heram?

inter Arianorum infensissimorum persequutiones ad extremam vsque se seruauit ætatem, qui Nicenæ fidei veritatem aduersus tot insidias ac technas calumniatorum & hostium, tot Imperatorum vim atque potentiam, tot annos vnus prope sustinuit; quas res ille non præclarè gessit, non ætate ac viribus, sed animi consilio, patientiâ, ac constantiâ? Quâ in fide tuendâ plurimum quoque senex Olius Cordubensis (nam centesimum superauit annum) adlaborarat; sed denique nimium amâs sui sepulchri, corporis sui, in Arianorum partes pertrahi se passus est. Nihil igitur afferunt, qui in re gerendâ versari senectutem negant, timileque sunt, vt si qui gubernatorem in nauigando agere nihil dicant, cum alij malos scandant, alij per foros cursitent, alij sentinam exhaustant; ille autem clauum tenens sedeat in puppi quietus. Non facit ea quæ iuuenes, at verò multò maiora, & meliora facit: non enim viribus, aut velocitatibus, aut celeritate corporum res magnæ geruntur, sed consilio, & authoritate, & sententia, quibus non modò non orbari, sed etiam augeri senectus solet. Adijce, vt Christiano loquamur oræ, res magnas geri Diuinâ ope per assiduas preces imploratâ, cælitus inuocato, ac deducto Diuinæ gratiæ præsidio, sine quo frustra nititur omnis humana cura, diligentia, atque industria. *Nisi Dominus adificauerit domum, in vanum laborauerunt qui adificant eam. Nisi Dominus custodierit ciuitatem, frustra vigilat qui custodit eam.* Agedum, id omninò demus, quod minimè dandum ratio atque

atque experientia commonstrat: id tamen demus, senectutem auocare nos ab omni re gerendâ, ab omni curâ & administratione rei tum publicæ, tum priuatę: idque vnum seni relinquamus, vt Deum continenter precetur, orando Deo, contemplando, ac diligendo perpetuò vacet; an non id eximium est eius ætatis beneficium? An non præstans negotium, cæleste ac diuinum, in quo omnis ætas, sed præcipuè senectus occupetur? Demus hoc otium seni, quod potest huic otio negotium anteferri, aut omnino comparari? Negotium negotiorum, appellat Bernardus, Sabbathum delicatum, quod sex dies antecedentium ætatum actuosæ vitæ consequatur; silentium, quod mediâ horâ fit in cælo; Nam rara hora, & brevis mora, interior eremus, ac solitudo, quâ Deus intra cordis penetrabile circumferatur, requies ac refectio mentis, sobria ebrietas de fonte vitę, somnus animæ languentis amore Diuino, denique mors, & sepulchrum. Mors duplex, authore eodem S. Bernardo, Hominum, cum quis cupiditatibus pridem compressis emoritur; Angelorum, cum etiam similitudinibus rerum corporarum exuitur: sepulchrum, quod sibi senes effodiant. *Qui expectant mortem, & non veniunt, quasi effodientes thesaurum: gaudentque vehementer cum inuenerint sepulchrum.* Si cum Deo nobis versandū est, aut cum proximo, cum Deo certè potius: id enim & dignius, & vtilius, & omnino iucundius. Vt amor Dei superat, generatque ex se amorem proximi, sic contemplatio longo spatio vincit, & ex se tamen progignit

Iob. 3.
v. 21.

gignit actionem, quâ proximus adiuuetur. Non potest senex operibus se misericordiæ corporalis impendere; at spiritalis semper potest, quæ tantò sunt illis præstantiora, quanto animus corpore præcellit. Sufficit seni Deus, præter quem nihil omnino sufficit. *Quàm bonus Israël Deus his, qui recto sunt corde!* Dicat exercitatus in spiritu senex: *Mihi autem adharere Deo bonum est, ponere in Domino Deo spem meam.* Bonum mihi est huic studio diuini cultus omnem ætatem reliquam, ac senectutis omne momentum transcribere, ut quod superest in Deo vno viuam ac moriar. Amen.

At memoria minuitur in senibus; Credo, nisi exerceas eam, aut si sis naturâ tardior: nec verò quemquam senum audiui oblitum, quo loco thesaurum obruisset. Omnia quæ curant, meminerunt. Manent ingenia senibus, modò permaneat studium, & industria. Rectissimè sanè; modò permaneat studium & industria: Nihil enim magis cauendum est senectuti, quàm ne se languori, desidiæque dedat, ne sit iners, somniculosa, ac torpida, sed operosa semper, & aliquid agens ac moliens, tale scilicet quale cuiusque studium in superiore vitâ fuit. Nullo non die psalmum aliquem condiscat, atque vsurpet memoria; quod de Cardinale Sirleto ferunt, priusquam domo progredere-tur; aut alium scripturæ locum commemo-rando pertractet, quotidieque addiscat aliquid, ut Solonem in versibus gloriantem videmus, qui se quotidie aliquid addiscentem senem fieri dicit. Catonis ipsius exemplum sequatur, qui Pythagoræorum more, exercendæ me-moriæ

memoriæ gratiâ, quæcumque dixerat, audiuerat, egerat, commemorabat vespere. Quod Deo reddendæ rationis gratiâ, duplex viurpamus examen, meridiæ ac vespere, non mediocriter senilem quoque memoriam excitabit, ac confirmabit.

Memoriæ defectum non adeo deplorarim in senectute, si quod contigit Beato Hugoni Episcopo Gratianopolitano, alijsque nonnullis superiore sæculo, rerum externarum, ac sæcularium imagines dumtaxat oblitterentur, non æquè species rerum spiritualium, ac diuinarum confundantur. De Beato Hugone sic memorat Guido Carthusiæ Prior celebratus epistolis S. Bernardi, qui vitam Sancti Hugonis iussu Papæ Innocentij secundi perscripsit: Per extremæ infirmitatis violentiam deletâ, vel perturbatâ pene totâ memoriâ in eâ dumtaxat parte, quæ bonis malisque communis est, & bonis ad bonos, malis ad malos indifferenter vsus deseruit, localium, & temporalium rerum continens formas; Eâ ergo memoriæ parte oblitteratâ, siue confusâ, pars illa, quæ veritatis, ac iustitiæ, totiusque diuini cultus impressa litteris in hominibus sanctis, & Angelis, pietatis tantum congruit actibus, non solum æquè vt prius, verum etiam interdum constantior, feruentiorque innotuit. Quam rem, sanè stupendam, miraculo putat adscribendam hic author. Obijt S. Hugo propemodum octogenarius, & parentem suum, quem ad Carthusiæ perduxerat institutum, in quo decem & octo perseuerauit annos, ferè centenarium extulit.

Aptissi-

Aptissimè Cato, cum de curanda valetudine tractat (qui locus erat alter de vitijis senectutis.) Nihil mirum in senibus, si infirmi sunt aliquando, cum ne id quidem adolescentes effugere possint, sed resistendum est, inquit, senectuti, & eius vitia diligentia curanda sunt, pugnandum, tanquam contra morbum, sic contra senectutem; habenda ratio valetudinis, utendum exercitationibus modicis, tantum cibi, & potionis adhibendum: ut reficiantur vires, non opprimantur. Neque verò corpori solum subueniendum est, sed etiam menti, atque animo multò magis: Nam hæc quoque, nili tanquam luminis oleum instilles, extinguuntur senectute, & corpora quidem exercitationum defatigatione ingrauescunt; animi autem se exercitando leuantur. Nam quos ait Cæcilius comicus stultos senes, hos significat credulos, obliuiosos, dissolutos; quæ vitia sunt non senectutis, sed inertis, ignavæ, somniculosæ senectutis. Ut petulantia, ut libido magis est adolescentum quam senum, nec tamen omnium adolescentum, sed non proborum; sic ista senilis stultitia, quæ deliratio appellari solet, senum leuium est, non omnium.

Desiderantur itaque vires ex corporis in senibus, eaque valetudo sufficit, quæ ad explendum munus officij, ac vitæ satis esse queat. Ut adolescens vires tauri, atque elephantis non desiderat; ita neque senex adolescentis. Non se corporis, sed animi viribus tuetur senex; sit licet imbecillum, ac morbis fractum, debilitatumque corpus, dum integra mens

mens ac ratio vigeat, corpore senex esse poterit, animo nunquā erit. Et sanē quis non malit ingenij vires sibi quā corporis dari, atque accrescere? Atque ita vsu venit interdum, vt imminutis corporis viribus augeantur animi, & quemadmodum in staterā dum deprimitur altera lanx, erigitur altera; ita dum corpus fatiscit, ac deficit in senectute, erigit se, & ad sibi cognatas res spiritales animus extendit, dum à concretionē corporis seiungit se, ac spiritalis totus efficitur; plenius quoque diuina luce collustratur, dum nullā corporearum rerum densā nube velut obfuscatur. Potest exercitatio, & temperantia in senectute conseruare aliquid pristini roboris. Est in nonnullis firma, constans, viridisque senectus; sed esto sit imbecillis, & ægra; adlit modò moderatio virium, & tantum quantum quisque potest nitatur. Quod enim homini naturaliter insitum est, eo decet vti, & quicquid agas, agere pro viribus. Certus est cursus ætatis, & via vna nature, eaque simplex, sua cuique parti ætatis tempestiuitas est data: Vt enim infirmitas est puerorum, & ferocitas iuuenum, & grauitas iam constantis ætatis; sic senectutis maturitas, naturale quoddam habet, quod suo tempore percipi debeat.

An ne eas quidem vires senectuti relinqueamus, vt adolescentulos doceat, & ad omne officij munus instruat atque instituat, quo quidem opere quid potest esse præclarius? Nunquam non enim, qui plurimum vsu atque experientia valent, bonarum artium, ac virtutum habendi sunt Magistri; quamuis con-

senuerint

senuerint vires, atque defecerint. Atque
 vt adolescentem eum laudamus, in quo
 sit aliquid senile; sic senem, in quo adoles-
 centis est aliquid, qui adolescentibus bonâ
 indole præditis delectetur, cuius præceptis
 gaudeant adolescentes, monitis atque exem-
 plis ad virtutum studia ducantur & inciten-
 tur. Ad ultimamiam, & decrepitam propemodum
 ætatem peruenerat Hieronymus, vt ipse
 de se ad S. Augustinum testatur; Me autem
 ætatis ultimæ, & pene decrepitum, ac mona-
 sterij, ac ruris secreta sectantem paruipendunt;
 Et tamen exhausto ieiunijs, vigilijs, ac mor-
 bis corpusculo, supplente quod corpori deerat
 animo vigente, non solum in Hæreticis in-
 sectandis, sacrarumque litterarum commen-
 tarijs elucubrandis, elaborabat; Sed in con-
 uentu quoque fratrum Bethleemitici Mona-
 sterij Bibliorum libros à Septuaginta versos
 exponebat: Egone, inquit, aduersus Rufi-
 num, contra Septuaginta interpretes aliquid
 sum locutus, quos ante annos plurimos dili-
 gentissimè emendatos meæ linguæ studiosis
 dedi, quos quotidie in conuentu fratrum edis-
 sero quorum psalmos iugi meditatione de-
 canto? Ruffinus Grammatici eum vsum of-
 ficio, & ante non multos annos nobilium
 pueros sibi ad discendum Christi timorem
 commissos, humanioribus poetarum, & Hi-
 storiorum litteris imbuisse criminabatur,
 quasi probrosum crimen, & non immensa sit
 ea laus, vnà cum Christianæ religionis rudi-
 mentis, litteras humaniores illi ætati necessa-
 rias tradidisse. Me sanè delectat sæpius
 lecta

Ep. 86.

l. 2. con-
tra Ruffi-
num.

11. Inuect.

lecta D. Hieronymi de Pacatule infantule educatione ad Gaudentium epistola, & extrema illa clausula ad Letam de Paulâ filiola. Ipse, si Paulam miseris, & Magistrum me, & nutritium spondeo, gestabo humeris, balbutientia senex verba formabo, multò gloriosior mundi Philosopho, qui non Regem Macedonum Babylonio periturum veneno, sed Ancillam & Sponsam Christi erudiam, Regnis Cælestibus offerendam.

Ad Paulum Concordiensem; misimus interrim te tibi, Paulo seni, Paulum seniore. Concordiensis centesimum agebat annum, Paulus senior Anachoretarum Princeps, centesimum decimum tertium, cum ab Antonio nonagenario, diuino monitu, atque impulsu esset visitatus; cuius vtriusque senis sanctissimi in summa abstinentia, & austeritate ultra centesimum annum vita producta (nam & Antonius centesimum quintum attigit) morborum, quod sciamus, & ægritudinum expers; non illis obnoxiam semper esse senectutem, clarè demonstrat. Humanæ vitæ breuitas, ait Hieronymus, (adde quæ breuitatem eam aduehit corporis imbecillitas,) damnatio est delictorum; atque in peccatorum pœnam, quotidie vires acciduntur, ac præmaturæ morti præda velut obijcitur. Ipsa defectio virium adolescentiæ vitijs efficitur sæpius, quàm senectutis: libidinosa enim, & intemperans adolescentia effæctum corpus tradit senectuti. Moyses centum & viginti annorum erat, quando mortuus est, non caligauit oculus eius, nec dentes illius moti sunt.

2. Paral. 24
v. 35.

Commemoranda quoque Ioiadæ Pontificis senectus. *Senuit autem Ioiada plenus dierum, & mortuus est cum esset centum triginta annorum.* Qui postquam, obiit delinito Rege Principum obsequijs, pessum abiit Respublica. Huiusmodi florentem, atque integram senectutem dignis laudibus effert, in Paulo Concordiensi Hieron. Ecce iam centenus ætatis circuitus voluitur, & tu semper præcepta Domini custodiens, futuræ beatitudinem vitæ per præsentia exempla, meditaris. Oculi puro lumine vigent, pedes imprimunt certa vestigia, auditus penetrabilis, dentes candidi, vox sonora, corpus solidum, & succi plenum. Cani cum rubore discrepant, vires cum ætate dissentiunt, non memoriæ tenacitatem, ut in plerisque cernimus, antiquior senectâ dissolvit; non calidi acumen ingenij frigidus sanguis obtundit, non contractam rugis faciem arata frons exasperat, non denique tremula manus per curuos ceræ tramites errantem stylum ducit, futuræ nobis resurrectionis virorem, in te Dominus ostendit, ut peccati sciamus esse, quod cæteri adhuc viuentes præmoriuntur in carne: iustitiæ, quod tu adolescentiam in alienâ ætate mentiris; Et quamquam multis illam corporis sanitatem, etiam peccatoribus, evenire videamus; tamen illis Diabolus ministrat, ut peccent; tibi Dominus præstat, ut gaudeas.

Hæc senectæ viridis encomia totidem prope verbis ad te transcribi possint, Amplissime Domine, si vnam, qua subinde tentaris, podagræ excipias ægritudinem, de qua quidem

dem quid attinet inquirere, quam ex causa potissimum oriatur? an ex tuorum progenitorum quadam velut hæreditaria transfusione? an ex ætatis & naturæ prope fatiscantis infirmitate? an ex curarum, molestiarumque difficultate, ex qua redduntur humores acriores? Ex intemperantia certè victus, aut aliarum voluptatum immoderatione certissimum habent non nasci, qui quotidianum tuum ieiunium, tot iam annos abstinentiam ab omni coena nouerunt.

Hoc eodem podagræ morbo vehementer se afflictatum, cum nihil interea publicorum intermitteret negotiorum, quibus vniuersam administrabat Ecclesiam, scribit Gregorius Magnus Pontifex ad Secundinum Abbatem, & ad Sanctum Leandrum Episcopum Hispalensem, qui & ea lem ipse podagra laborabat. Certè, inquit Baronius, si numerandos suscipias viros sanctitate celebres, qui podagræ morbo sunt afflictati, copiosum conficies catalogum, quo relarguas eos, qui voluptuosos ex podagræ doloribus arguant homines, Ad Italicam Patriciam ita Gregorius: Peccatis meis exigentibus ecce iam vndecim menses sunt, quod valde rarum est; si delecto surgere aliquando potuero, vt vita mea mihi grauissima pœna sit. Quotidie in dolore deficio, & mortis remedium expectando suspiro. Perseuerauit ea ægritudo ad biennium vsque, vt scribit ad Eulogium Alexandrinum Episcopum: Ecce iam biennium pœnè expletur, quo lectulo tencor, tantisque podagræ doloribus affligor, vt vix in diebus festis vsque ad hora-

l. 9. ep. 57.
indict. 2.

Ep. 125.

Bar. Ad
an. 599.

127.

l. 8. ep. 33.
indict. 2.

rum trium spatium surgere valcam, Missarumque solennia celebrare; Mox autem cum graui compellor dolore decumbere, vt cruciatum meum possim interrumpente gemitu tolerare: Qui dolor mihi interdum lentus est, interdum nimius; sed neque ita lentus, vt recedat; neque ita nimius, vt interficiat; vnde fit, vt qui quotidie in morte sim, quotidie repellar à morte, nec mirum qui peccator grauis talis corruptionis carcere diu teneor inclusus, vnde compellor exclamare: Educ de carcere animam meam ad confitendum nomini tuo. Quod nihil interea Gregorius Magnus pastoralis suæ curæ negotiorum remiserit, ex eo perspicuum est, quod nullus sit annus, quo maiora pertractata negotia, vel plures ab eo scriptæ reperiuntur epistolæ, vt eundem cernere esset & affixum lecto, & velut alitem cælestem epistolarum penni stoto velut orbe volitantem.

Quare habes, Admodum Reuerende Domine, cum te podagra diuexat, quo te soleris, quemque inuoces ad eam mitigandam optimum Patronum, Gregorium verè Magnum incomparabilem Pontificem; Cuius honori & cultui religioso quàm sis addictus, amplissimum Duaci Collegium Gregorianum apud omnem posteritatem eloquetur. Cæterum aduersum te mitior ac benignior esse videtur podagra, quæ rarius affixum lecto distineat, rariusque omnino per interualla recurat, quam & productioris vitæ causam, & notam tibi esse vehementer optamus.

Occulta sanè sunt, sed iustissima semper Dei iudicia, nec homini potest esse exploratum,

raturum, cur quibusdam interdum improbis intemperanter, atque impurè viuentibus, inter vina, ac scorta, prouectissimam ætatem tribuat, vt de Attila Hunnorum Rege ferunt crudelissimo, qui centum quatuor & viginti annos impleuit; multis verò piè temperanterque vitam agentibus, illam varijs morborum generibus affligat, & ante senectutem, maturamque adeo ætatem præcidat. Nimirum quæ sunt huius vitæ temporaneæ bona caduca, opes, honores, voluptates, sanitatē, ac longam vitam non magni Deus æstimat, & insensibilis sibi sæpe largitur hostibus, quos in omnem æternitatem destinauit dirissimis Orci supplicijs, quos autem amat ac cælo preparat Empyreo, ad tempus exercet, ac veluti compendio perficit, ipsum spiritalis exercitationis, ac probationis tempus abbrevians. Quamquam & in alijs sibi percharis, ad maius obsequium suum, meritorumque, gratiæ ac gloriæ eorum maius augmentum, longissimam vitam, ac senectutem plusquam decrepitam, animi semper sensibus integris, quandoque proroget, ac producat, vt in plerisque Anachoretis cernere est, quibus ad eam ipsam prouectam ætatem, mirè profuit innocentia vitæ, passionum moderatio, voluptatum abstinentia, cibi potusque parsimonia, cælestium denique solatiorum copia: Nam *dulcedo anima sanitas offitium.* Prou. 16. 24.

Pachomius Abbas in Ægypto, ad annū centesimum decimum peruenisse dicitur. Ioannes Abbas Reomanensis, S. Alpherinus Abbas Canensis, prope Neapolim, ad centesimū vigesimum, quem etiam attigit S. Romualdus, &

centum ipsos in summa asperitate traduxit, vultu semper adeo læto, ut intuentes exhilararet, Paphnutius, Macharius, S. Franciscus de Paula, alijque quam plurimi nonagesimum excefferunt; Sed horum tamen, ut verum fateamur, præ senum imbecilium multitudine, longè minor est copia. Senectus ipsa per se morbus est, plurimis certè morbis obnoxia, & ad dissolutionem mortemque proxima preparatio, ut eam appellat Tullius in Topicis, occasus vitæ.

Psa. 89.
v. 10. 11.

Quotusquisque est (vix singulis sæculis unus alterve reperietur) qui centesimum attingat annum, aut cum attigerit, non se attigisse peniteat? *Anni nostri sicut aranea meditantur: dies annorum nostrorum*, ait Psaltes Regius, *septuaginta anni*; *Si autem in potentatibus, octoginta anni: & amplius eorum, labor & dolor. Quoniam supervenit mansuetudo, & corripiemur. Quis novit potestatem iræ tuæ, & pro timore tuo iram tuam dinumerare?* Quandoque ex Divinæ Clementiæ benignitate præcinditur vita; quandoque ex Iustitiæ severitate, vel ob adolescentiam iuventutemque intemperanter exactam, vel ob aliorum peccatorum, quæ plurima semper admittimus, vindictam, ac pœnam; vel ad patientiæ, cæterarumque virtutum exercitationem, meritorumque maius augmentum, ac cælestis gloriæ cumulum, ægritudines fere molestæ, ac diuturnæ mortem præcurrunt, & accelerato veluti gressu maturius aduehunt. Quare non ex eo capite quod crebrioribus morbis sit obnoxia senectus condemnanda est; quem-

admo-

admodum neque iuuentus, aut constans ætas imbecillior in quibusdam, minimeque homini Christiano morbus, & aduersa valetudo, in malis semper censerī debet; sed plerumque in bonis, æquè etiam, ac magis, quam sanitas, & prospera valetudo, si nimirum æquè, ac magis ad extremi finis assequutionem conferat.

Dicere consueuerat, S. Pater Ignatius, morbum non minùs Dei donum esse, ac sanitatem, neque minus de morbo, quam de sanitate gratias Diuino Numini referēdas; cum vtrumque sit æquè Dei munus, & non rarò, morbus languentes ac tepidos exsuscitet, & nouo quodam ardore compleat, adeoque etiam renitentes, concitatore gressu virtutis ad Deum ire compellat. Hoc freno Deus, animusque Deo sessore gaudens, corpus velut equum indomitum, atque efferatum regit atque compescit, ne in cæpto perfectionis itinere cæspitet atque exorbitet, ne torpeat obdormiens, ne lasciuiat atque recalcitret, his illud calcaribus ad accelerandum gradum exstimulat, his vrget ad beatæ vitæ metam incitatore semper virtutum cursu prosequendam.

Mihi sanè morbus veluti nuntius quidam à Deo submissus, qui nos ad eum euocet, qui Diuino tribunali sistat, apparitor ac liCTOR Diuinæ Iustitiæ (quāquam non peremptoria, neque extrema semper ea citatio est, neque læthalis semper morbus) animo tamen gratissimo, ac lætissimo videri solet excipendus. Est sanè nuntius, qui nos nostræ commonefaciat imbecillitatis, ac mortalitatis, qui

mortem ipsam proximè mox adfuturam præ-
nuntiet, ad eamque maiori cura, atque opera,
& aucta virtutum exercitatione nos præpa-
ret. Si quando præceptum hoc Domini, de
vigilijs, atque excubijs, ad eius aduentum
habendis, magna cura est obseruandum; in se-
nectute certè, vltima noctis vigilia, vltra
quam eius aduentus minimè differetur, ob-
seruandum est. *Sint lumbi vestri præcincti, &
lucerna ardentes in manibus vestris, & vos similes
hominibus expectantibus Dominum suum quan-
do reuertatur à nuptijs.*

Luc. 12.
v. 35.

Greg.
Hom. 13.
in Euang.

Si prioribus vigilijs non venit Dominus,
vltima certè senectutis adueniet, ac iam iam
præ foribus esse putandus est. Pulsat autem
fores Dominus, cum per ægritudinis mole-
stias, mortem vicinam esse designat, cui
confestim aperimus, si hunc cum amore
suscipimus. Quò diuturnior est morbus,
& grauior ægritudo, cò diutius ac vehem-
entius pulsat Dominus, ac maiore cum pa-
tientia ad vitæ nos emendationem prouo-
cat; Aperire iudici pulsanti non vult, vt sibi
malè conscius in carcere reus, qui exire de cor-
pore trepidat, & videre eum quem contem-
plisse se menimit, Iudicem formidat; Qui
autem de sua spe, & operatione securus est,
pulsanti confestim aperit, quia lætus iudicem
sustinet, & cum tempus propinquæ mortis
aduenerit, de gloria retributionis hilarescit.

O felicem illum senem, qui per ægritudines,
ac morbos corporis, ipsamque fatiscentem,
ac quotidie morientem senectutem, ad Domi-
num aduenientem dignè excipiendum, Fide,
Spe,

Spē, Charitate, omnique virtute se comparit, qui præcinctis continentia lumbis, & bonorum operum charitatis face succensa, vltro prodierit obuiam, ad cēlestesque nuptias Agni lætissimus accelerarit, atque introiit.

Cæterum qualem te inuenit Deus cum vocat, talem pariter & iudicat. Vbi te inuenero, ibi te iudicabo. Qualis exieris ex hac vita mortali, talis alteri redderis immortalī. Quid verò stolidius fieri potest, si mens ad perfectionem festinare non contendat, quando totius corporis habitu senectute confectus homo ad interitum properat? dum oculi caligant, aures grauitè audiunt, capilli fluunt, facies in pallorem mutatur, dentes lapsi numero minuuntur, cutis crescit, flatus grauitè olet, pectus suffocatur, tussis cachinnat, genua trepidant, talos & pedestumor inflat? Homo interior, qui senescit, his omnibus aggrauatur, & hæc omnia ruituram iam domum corporis nostri citò prænuntiant.

Mors certè a senectute longius abesse non potest, meritoque laudatur illud Sanctæ Marcellæ responsum, cum eam Cerealis, cuius clarum est in Consulibus nomen, senex ambitiosius procaretur, suasque longæuus polliceretur diuitias, mandaretque & senes posse diu viuere, & iuuenes citò mori; eleganter lusit: Iuuenis quidem citò mori potest, sed senex diu viuere non potest. *Memento igitur Creatoris tui, monet Ecclesiastes, in diebus iuuentutis tuæ, antequam veniat tempus afflictionis, & appropin-*

Eccle. 12.
v. 1. &c.

appropinquant anni, de quibus dicas: non mihi placent: antequam tenebrescat sol, & luna, & stella, & reuertantur nubes post pluuiam: quando commouebuntur custodes domus, & nutabunt viri fortissimi, & otiosa erunt molentes in minuto numero, & tenebrescent videntes per foramina: & claudens ostia in plateâ &c. Florebit amygdalus, impinguabitur locusta, & dissipabitur capparis &c. Quæ perquam accommoda est senectutis ad mortem proximè vergentis descriptio; cum sol intellectus, luna phantasiæ & imaginationis, stellæ sensuum tum internorum, tum externorum tenebrescere incipiunt, cum pluuiarum nubes lacrymarum imbres crebriores ingerunt, cum augescit pituita, cum abundant catarrhi, cum tremunt ossa, labascunt tibiæ, dentes excidunt, obscurantur oculi, sensus omnes deficiunt, & difficulter suo munere singula membra defunguntur, breuiter cum vita deficit, & in mortem transit. Amygdalus canitiem adumbrat, Capparis concupiscentiam, quæ frigescit in senectute. Vanitas vanitatum, dixit Ecclesiastes, & omnia vanitas; Si ad æternitatis beatæ finem vltimum non referantur, vana sunt, & sine suo carent, ob quem erant à Deo condita. Vanissimus senex, qui iâ corpore prope præmortuus non se ad huius assequutionem finis vltimi, studiumque virtutis, ac perfectionis, vel in extremâ compararit ætate, vt quò propius iam metam aspicit immortalitatis, ad illam non eò concitatioire gressu, cursuque feratur,

Verùm vt ad morbos reuertamur. Valent ad peccatorum exhaustiendas reliquias, maculasque

lasque, ac pœnas eorum facîle, matureque cum merito detergendas, quę post hanc vitam expiatorijs ignibus ad extremum vnguem vsque Diuinę iustitię fuerant exsoluendę; Quare morbi, genus quoddam sunt Purgatorij, compendiosum, ac perfacîle, non satisfactorium modò, verùm & meritorium, quo Diuina simul accrescat gratia, illique ex æquo post æternę glorię merces respondeat; quo ex utroque capite, non facîle quis æstimarit, quantum sit in morbis lucri, ac compendij spiritalis.

Valent præterea morbi ad Christo nos Duci nostro, accapiti conformandos, vt quemadmodum ille per Crucem, & Passionem intrauit in gloriam suam; ita nobis in alienam, sed summo eius beneficio, ac merito communicatam gloriam cælestem, per ægritudinum cruces aditus pateat, atque introitus. Vt sanguinis effusione Martyres, corporis afflictatione ac maceratione Confessores, regnum sibi cæleste pepererunt; ita nos illud tertè minimo dolorum ac morborum impendio comparare conuenit, ac necesse est. Debent enim membra mystici corporis Christo capiti patienti esse conformia, ac consentanea.

Quod si morbi mortem accelerent, atque opinione maturius vitam eripiant, ijs etiam maior habenda est gratia, quod aliquando sæculi huius ac corporis vinculis exsolutos maturius ad Deum perducant, atque in beata collocent æternitate, quòd omnem peccandi materiem, atque occasionem submoueant, optatissimumque, & in quo sunt omnia, perseueran-

seuerantiæ donum secum aduehant, quod extra periculum discrimenque salutis, in tuto securoque portu collocent, & quasi miseros vagosque exules in cælestem patriam celerrimo cursu perducant.

Neque verò tanti prorogationem vitæ, senectutisque lustra aliquot producta censuerim, modò nulla nostra interueniat culpa, vt religiosæ vitæ rigorem intermitteri penitus, medicinalisque exoticas pretij maioris conquiri, extraordinariamque adhiberi curationem velim; Quain re, atque hac omni morborum tolerantia præluxit egregiè nobis B. Fulgentius, Ruspensis Episcopus, extrema qua defunctus est ægritudine. Quamquam ex quo se Religiosæ vitæ professioni dederat, omne tempus egerat in pænitentia, ac summa austeritate; tamen annum ante mortem ab Ecclesiasticis occupationibus, ac Monasterio suo, clam in Insulam Circinam secessit, ibique in breui scopulo, cui nomen Chilmi, multò amplius ac diligentius, inchoanti similis, auxit pænitiæ ac mortificationis studium; coactus in urbem regredi, breui post in grauissimam incidit febrim, acutissimosque dolores, quos septuaginta prope diebus continenter pertulit, illam precationem frequenter vsurpans: Domine, da mihi modò hîc patientiam, postea indulgentiam; neque eam intermittebat siue dolor affligeret, siue febris incenderet, siue lassitudo dissolueret; persuadentibus Medicis vt lauacris balnearibus vteretur. Nunquid balneæ, inquit, facere poterunt ne homo mortalis, expleto vitæ suæ tempore, moriatur?

Apud Sur.
p. Ian.

tur? Si verò proximam mortem, nec aquarum calidarum possunt fomenta repellere, cur mihi, obsecro, persuadetis, ut rigorem diu seruatae professionis in fine dissoluam? Quo in proposito perseuerans, cum iam imminentem mortem cerneret, erratorum veniam à fratribus ac domesticis, summa cum animi demissione, maximaque lacrymarum vi, petijt; ac pecuniam suam in pauperes, quos nominatim recitabat, expendi voluit, orans iugiter, & intrantes singulos benedicens, usque ad extremam horam sana mente permansit. Postridie Kalendas Ianuarias, post peractam vesperam, beatum spiritum feliciter in manus Domini tradidit, annum agens Episcopatus sui vigesimum quintum, vitæ verò totius sexagesimum quintum; sicut multis ante fratribus indicauit.

Mortuus
an. 529. ut
not. Baro.

Hic sanè suauissimus Ecclesiæ Doctor, vires corporis in senectute non desiderabat, cuius ex ore melle dulcior profluebat oratio, atque utinam magna pars eius sermonum, ac monumentorum non deperiisset! Extant aduersus Trasimundum Regem præclari eius libri, & alij de fide aduersus Arianos, sed hominæ vix duæ tresve supersunt; quanquam inter varias occupationes, ait Author eius vitæ, plurimos sermones, qui in populis dicerentur, scribendos dictauit. Vbicumque sermonem faciebat, mulcebat animos omnium, non inanes & vanissimos plausus, sed compunctionem generans cordis; expectauit eum sanctæ memoriæ Bonifacius Carthaginensis, apud Burnos Ecclesiam dedicans, duobus diebus,

se præ-

se præſente tractantem, quando tantum delectatus eſt audire verbum Domini de ore eius, vt donec ille ſermonem finiret, ipſe terram lacrymis irrigaret, agens gratias Deo, cuius gratia ſemper in Eccleſia Catholica ſummos excitat, præclaroſque Doctores. Hic illud Catonis agnoſco; omnino canorum illud in voce ſplendescit etiam, neſcio quo pacto, in ſenectute. Decorus eſt ſermo ſenis quietus & remiſſus, facitque perſæpe ipſa ſibi audientiam diſerti ſenis compta oratio, & mitis.

Ad hoc idem argumentum pertinet præclara S. Hieronymi in ſecundum commentarium in Amos ad Pammachium præſatio, quâ ſenectutis commoda, atque incommoda expendit.

Lægi in quaſam controuerſiâ: Imbecillitas corporis animæ quoque vires ſecum trahit. E

2. Cor. 12.

contrario Paulus Apoſtolus: Quando infirmor, inquit, tunc fortior ſum: & Virtus in infirmitate perficitur. Spiritus enim contra

Gal. 5.

carnem, & caro contra ſpiritum; hæc inuicem ſibi aduerſantur, ne quæ volumus, illa faciamus.

Matt. 26.

Vnde & in Euangelio dicitur: Spiritus promptus eſt, caro autem infirma. Senectus multa ſecum & bona affert & mala; Bona, quia

nos ab impudentiſſimis Dominis liberat voluptatibus, gulæ imponit modum, libidinis

frangit impetus, auget ſapientiam, dat maturiora conſilia, & frigefcente corpore, dormit

cum perpetuâ Virgine Sunamite: luxuriamque contemnens cum Berzellai, delegat eam

filio adoleſcenti Camaham, & non vult transire Iordanem; atque in alienos fines de

ſuis finibus, id eſt regionibus, exire. Quæ autem

1. Reg. 2.

2. Reg. 19.

autem putantur senectutis mala, ista sunt:
 • crebræ infirmitates, pituita molestissima;
 quam Græcorum alij *χρόνους*, alij *φλέγμα* nuncupant: caligantes oculi, acescentes cibi, tremens interdum manus, nudi gingiuis dentes, & inter cibos cadentes. Ad hæc torminibus, & aculeis stomachi, podagræque, & chiragræ doloribus sæpè torquetur, ita, vt ne stylum quidem, aut calamum tenere queat, vt suis pedibus non possit incedere, magnaque parte vitæ videatur esse truncata, & multis in membris præmortua. Cum hæc ita se habeant, in malorum comparatione, tolerabilius sustinebo morbos, dummodo vna, & grauissima Domina libidine caream. Patitur quidem & senectus nonnunquam incentiua vitiorum, nullusque, iuxta S. Martyrem Cyprianum, diu tutus est periculo proximus. Sed aliud est titillari, aliud obrui voluptatibus. Ibi cum Apostolo adolescentia loquitur, quæ nouit virentis corporis necessitates: Non enim quod volo bonum, hoc ago, sed quod nolo malum, illud facio. Et miser ego homo, quis me liberabit &c. Hic autem rarò inter emortuos cineres scintilla sub lucens reuiuiscere nititur, & tamen incendia non potest suscitare. Quamobrem Pammachi, cano iam mecum capite, impetra mihi à Domino, vt comitem mihi merear habere Sapientiam, de qua scriptum est: Ama illam, & seruabit te: honora illam, & amplexabitur te: vt ipsa adiuuante & socia, cœptum in Amos opus expleam.

Rom. 7.

Pridem & alibi caput suum canis aspersum memorat, quod & pileolo confouebat, de quo

quo ad Paulinum gratias agens: Pileolum
 texturâ breue, charitate latissimum, senili ca-
 piti confouendo libenter accepi, & munere,
 & muneris authore letatus. Idem se iam labo-
 rem propriâ scribendi manu ait ferre non va-
 lere. De caligantibus etiam oculis aliquid
 Isaac patientibus conqueritur, animo tamen
 semper infracto fuit, neque vnquam com-
 mentandi Sacras Litteras, Hæreticosque in-
 sectandi studium suum acerrimum intermi-
 sit.

Consimilem egit senectutem, morbis, & stu-
 dijs exercitam, consimilis illi, & par sanctitate,
 doctrinâ, nominisque celebritate Doctor Ec-
 clesiæ Sanctus Augustinus, de quo vitæ eius
 Scriptor Possidius: Vixit Augustinus annis sep-
 tuaginta sex (quæ prouectæ senectutis ætas
 est) in Clericatu autem, vel Episcopatu annis
 ferme quadraginta. Verbum Dei vsque ad
 ipsam suam extremam ægritudinem impræ-
 termisè, alacriter, & fortiter, sanâ mente,
 sanoque consilio in Ecclesiâ prædicauit. Et in
 suis quidem scriptis ille Deo acceptus & cha-
 rus Sacerdos, quantum lucente veritate vide-
 re conceditur, rectæ ac sanæ Fidei, Spei, &
 Charitatis, Catholicę Ecclesiæ vixisse mani-
 festatur; quod agnoscunt, qui eundem de
 Diuinis scribentem legentes proficiunt; Sed
 ego arbitror plus ex eo proficere potuisse, qui
 eum & loquentem in Ecclesiâ præsentem au-
 dire, & videre potuerunt, & eius præsertim
 inter homines conuersationem non ignora-
 uerunt. Erat enim non solum eruditus scri-
 ba in Regno Cælorum, de thesauro suo pro-
 ferens

ferens noua & vetera, & vnus negotiatorum, qui inuentam pretiosam margaritam, quæ habebat venditis, comparauit; verum etiam ex ijs ad quos scriptum est: Sic loquimini, & sic facite; & de quibus Saluator dicit: Qui fecerit & docuerit sic homines, hic magnus vocabitur in Regno Cælorum. Iac. 1.
Matt. 5.

Dum tibi Presbyterum Eradium de Cleri populi que consensu successorem delignat in gestis Ecclesiasticis, quæ in suos annales retulit Baron. sic exorsus est. Omnes in hac vitâ mortales sumus, & dies huius vitæ vltimus omni homini est semper incertus: verum tamen in infantiâ speratur pueritiâ, & in pueritiâ speratur adolescentiâ, & in adolescentiâ speratur iuuentus & in iuuentute speratur grauitas, & in grauitate speratur senectus: vtrum contingat, incertum est; est tamen quod speretur; senectus autem aliam ætatem quam speret, non habet: incertum est enim ipsa senectus quamdiu sit homini; illud tamen certum est, nullam remanere ætatem, quæ possit succedere senectuti. Bar. ad an.
Chri. 426.
fol. 494.

Cur autem in successorem designatum vellet refundere onera occupationum suarum, illam affert causam; vt quantumcumque, inquit, spatium mihi huius vitæ donauerit Deus, ipsam meam quantulumcumque vitam non dem segnitiei, neque dohem inertiae, sed in sacris scripturis, quantum ipse permittit, & largitur, exerceam. Hoc & ipsi proderit, & penipsum etiam vobis. Nemo ergo inuideat otio meo, quod magnum habet negotium. fol. 496.

tium. Magnum hoc in otio negotium erat,
 de quo proximè supra: Placuit mihi, & vobis
 propter curam scripturarum, quam mihi Pa-
 tres, & fratres mei Coëpiscopi duobus Con-
 cilijs Numidiæ, & Carthaginis imponere
 dignati sunt, vt per quinque dies nemo mihi
 molestus esset, quod tamen seruatum non est.
 Magnum negotium, de quo ad Marcellinum
 epistolâ 7. Si mihi Deus quod volo præstite-
 rit, vt omnium librorum meorum quęcum-
 que mihi rectissimè displicent, opere aliquo
 ad hoc ipsum instituto, colligam atque de-
 monstrem, tunc videbunt omnes homines,
 quàm non sim acceptor personæ meæ. Ma-
 gnum denique negotium aliæ scriptiones, tum
 aduersus Iulianum, qui præter quatuor li-
 bros, quibus iam à S. Augustino responsum
 erat, octo alios ediderat; è quibus Alypius
 quinque Româ transmiserat, cuius instantiâ,
 inquit, coactus sum remissius agere quod age-
 bam, vt operi vtrique non deessem, vni die-
 bus, alteri noctibus, quando mihi ab alijs
 occupationibus, hinc atque inde venire non
 desistentibus, parceretur; tum aduersus ob-
 iectiones Gallorum quorūdam, quas ad
 eum detulerant: Prosper, & Hilarius, quibus
 vt satisfaceret duos scripsit libros præstantis-
 simos, vnum de prædestinatione Sanctorum,
 alterum de bono perseverantiâ. Vt autem tradit Prosper in Chronico, mo-
 ritur s. Kalend. Septembris, septem libris Iu-
 liani inter impetum obsidentium Vandalorū
 in ipso dierum suorum sine respondens,
 & gloriosâ in confessione Christianę gratiæ
 perseue-

perseuerans. Fuisse verò illum multis morbis obnoxium, ex varijs eius epistolis colligitur, 13. ad suos, dum ob minus idoneam valetudinem ab Episcopis excusari se scribit, quò minus, vt alijs, transmarinæ legationes ei à Synodis iniungerentur. 27. ad Victorinum, 149. ad Profuturum. 56. ad Dioscorum. 162. ad Dيارium. 251. ad Nobilium. Baron. ad ann. 430. fol. 551. Satis erat hoc exemplorum; sed quia consimilis prope cursus ætatis, ac studiorum fuit duorum S. Aug. illustrium Imitatorum, Bedæ Presbyteri, & Alcuini Imperatoris, vt aiunt, Caroli magni Præceptoris, aut certè familiaris; ad cumulum, duo hæc quoque præclaralumina Ordinistui, & Sacræ Religiosæ familiæ Benedictæ si accesserint ad illustrandam piam, doctam, in otio litterario traductam senectutem, non grauati, opinor, accipies.

Bedam Presbyterum ad annum vsque centesimum quintum, aut etiam centesimum trigessimum peruenisse, ex eius scriptis conficere quidam enituntur, septuagenario certè maiorem obiisse non dubium est, cum septennis in Monasterij SS. Apostolorum Petri & Pauli disciplinam traditus, esset sub Abbate Benedicto, initiatus diaconatu decimo nono ætatis anno, Presbyteratu trigesimo.

Surius.

Nihil illi fuit dulcius, quàm in sacris litteris discendis, aut edocendis versari; Aut scribendo, aut docendo, aut orando, tempus omne consumpsit ætatis. Cumque ad extremam iam peruenisset, continuis septem hebdomadibus, ante diem festum Ascensionis, quo

sanctissimè expiravit, totus erat in tradendis prælectionibus Auditoribus suis, aut in psalmodiâ, & gratiarum actione, quam profusis lacrymis vix vnquam intermittebat; crebrius illud decantans: Gloria Patri, & Filio, & Spiritui Sancto; & Antiphonam illam, tempori congruentem: O Rex gloriæ, Domine virtutum, qui triumphator hodie super omnes celos ascendisti, ne derelinquas nos orphanos &c. Ad quæ verba largissimæ fluebant lacrymæ, ad quas & suos excitabat Auditores. Gratiâ Deo referebat, quod lic meruisset infirmari, stomachi dolore, & angustis, creberrimique anhelitus, oppressis, & sepe dicebat: Flagellat Deus omnem filium quem recipit: Et sententiam Ambrosij: Non lic vixi inter vos, vt me pudeat viuere, sed nec mori timeo, quia bonum dominum habemus.

Proa. 3.

Sed de prælectionibus auiliamus eius discipulum, et si prolixior est, quanto est epistola, quâ felicem mortem describit; tamen ipsâ sinceritate, & eximia pietate delectabit. In istis diebus duo opuscula memoriæ digna, exceptis lectionibus, quas quotidie accepimus ab eo, & cantum psalmorum facere studuit: id est, A capite Euangelij S. Ioannis vsque ad eum locum, in quo dicitur; Sed hæc quid sunt inter tantos? in nostram linguam, ad vtilitatem Ecclesiæ conuertit: & de libris Iudæi E. iscopi exceptiones quasdam, dicens: Nolo vt pteri mei mendacium legant, & in hoc postobitum meum sine fructu laborent.

Cum venisset autem feria tertia ante Ascensionem Domini, cepit vehementius agrotare in

tare in anhelitu, & modicus tumor in pedibus apparuit; totum tamen illum diem docebat, & hilariter dictabat, & nonnunquam inter alia dixit: Discite cum festinatione, quia nescio quamdiu subsistam, & si post modicum tollat me Factor meus. Nobis tamen videbatur, ne fortè exitum suum bene sciret. Noctem in gratiarum actione peruigil duxit, & mane illucescente, id est, quartâ feriâ, præcepit diligenter scribi quæ cæperamus, & hoc fecimus usque ad tertiam horam. A tertîâ autem horâ ambulauimus cum reliquijs Sanctorum, vt consuetudo illius diei poscebat, & vnus erat ex nobis cum illo, qui dixit illi: Adhuc capitulum vnum, de libro quem dictasti, deest, & videtur mihi tibi difficile esse te plus interrogare: At ille, inquit: facile est, accipe tuum calamum, & tempera, festinanter quæ scribe, & ille hoc fecit.

A nonâ horâ dixit mihi: Quædam pretiosa in mea capsellâ habeo, id est, piper, oraria, & incensa. Sed curre velociter, & adduc Presbyteros nostri Monasterij ad me, vt ego munuscula, qualia mihi Dominus donauit, illis distribuam. Et hoc cum tremore feci: Et præsentibus illis, locutus est ad eos, vixumque monens & obsecrans pro eo Missas, & orationes diligenter facere; & illi, libenter responderunt.

Lugebant autem, & flebant omnes, maxime autem in verbo quod dixerat, quia æstimaret, quod faciem eius amplius non multum in hoc sæculo essent visuri. Gaudebant autem de eo, quod dixit: Tempus est, si hic Factori meo

meo videtur, vt ad eum modo absolutus ex carne veniam, qui me, quando non eram, ex nihilo formauit. Multum tempus vixi, beneque mihi pius Iudex vitam meam prouidit. Tempus absolutionis meæ prope est: Etenim anima mea desiderat Regem meum Christum in decore suo videre: Sic & alia multa utilitatis causa ad ædificationem nostram locutus, in lectica diem vitimum vsque ad vespertum duxit.

Et præfatus puer Vuilberth dixit, Magister dilecte, restat adhuc vna non descripta. At ille, bene, inquit, consummatum est: veritatem dixisti. Accipe meum caput in manus tuas, quia multum me delectat sedere ex aduerso loco sancto meo, in quo orare solebam, vt & ego sedens Patrem meum inuocare possim: Et sic in pauimento suæ casuæ decantans: Gloria Patri, & Filio, & Spiritui Sancto, &c. Vltimum e corpore exhalauit spiritum: Qui ad easdem Sanctissimæ Trinitatis laudes continuandas in Cælum est ab Angelis deportatus. O felicem mortem, doctrinæ ac sanctæ senectutis dignissimam? Quis sacris hisce studijs docendi & orandi, Bedæ instar immori nolit? Cui ei Venerabilis cognomen tum adhæserit non aliam quæro causam, quam hanc ætatis prædictissimæ, eximiamque doctrinæ, ac sanctitatis inter suos auctoritatem.

Catalogus operum Alcuini habetur apud Authorem eius vitæ, in quibus elucubrandis, simul & epistolis ad multos utilissimis, reliquum suæ vitæ ducens tempus, cælestem in terris

in terris vitam egit, præstolans in nouissima politus vigilia Fili hominis aduentû, vt intraret cum eo ad nuptias, lauabat per singulas noctes lectum suum lacrymis, Sanctorum semper se muniens intercessionibus, quorum omni die celebrabat solennia. Nullo enim non die celebrabat Missas, quas cuique diei proprias designarat. Fugiebat moris omnibus otiositatem; Nam aut legebat, aut scribebat, aut discipulos erudiebat, aut orationi vacabat & psalmorum decantationi, ijs dumtaxat indulgens corporis necessitatibus, quæ non possent euitari.

Cum iam dissolui cuperet, & esse cum Christo, id vt die festo Pentecostes eueniret votis omnibus obsecrabat, & à Beatissima Matre videtur impetrasse, cuius hymnum Euangelicum cum hac Antiphona sæpius decantabat: O clavis David, & sceptrum domus Israël; cui aperis, & nemo claudit; claudis, & nemo aperit; veni, & educ vinctum de domo carceris, sedentem in tenebris & umbra mortis, adiecta oratione Dominica, plurimisque psalmorum versibus appositissimis: Quemadmodum desiderat ceruus ad fontes. Quam dilecta tabernacula tua, Domine virtutum! Beati qui habitant in domo tua. Ad te leuavi oculos meos. Ad te Domine leuavi animam meam, &c. Nocte Ascensionis decidit in lectum, graui fatigatus languore vsque ad mortem, nec poterat loqui; Tertia tandem antequam migraret die solitam exultationis voce decantauit Antiphonam. O clavis David, cæterosque psalmo-

rum versus. Die verò Pentecostes p̄eractio matutinali officio, qua hora consueuerat ad Missas ingredi, plenus dierum obiit, in cælesti templo, coram Agno, inter sacros Leuitas, semet hostiam sempiternæ laudis oblaturus, anno Domini octingentesimo quarto.

Hæ sunt igitur, in quibus Hieronymus, Augustinus, Fulgentius, Beda, Alcuinus excelluerunt, illustres ingenij exercitationes, hæc præclara mentis curricula, in his desudans atque elaborans corporis vires non magnopere desiderat, in his studijs laboribusque viuenti non intelligitur quomodo obrepit senectus; Ita sensim sine sensu ætas senescit, nec subitò frangitur, sed diuturnitate extinguitur; imò verò renouatur, & Dei munere felicissimè commutata in beatam migrat æternitatem.

Sequitur tertia vituperatio senectutis, quod eam carere dicunt voluptatibus. O præclarum munus ætatis, exclamat Cato, si quidem id aufert nobis, quod est in adolescentia vitiosissimum; at ego sat habuerim dixisse, periculosissimum! Non enim semper vitio ac culpæ affinis est voluptas, periculi tamen semper est plena, ipsi quoque senectuti non raro blanditijs suis graues insidias struens. Nullam capitaliorem pestem, quam corporis voluptatem hominibus à natura datam si dixerim, vereor ne & ingratus, & blasphemus sim in Deum authorem naturæ, qui ad eam tuendam ac propagandam, actionibus necessarijs voluptatis illecebram, ac suauitatem admiscuit, nè penitus illæ negligerentur; neque, si

que, si moderata sit ea voluptas, intra rectæ rationis limites comprehensa, dum naturalis eius seruetur modus, semper inhibita est.

Nihil quidem vnquam ipsius voluptatis causâ est agendum, neque pro scopo illa adhibenda est, qui turpis fuit, ac delirus error Epicuræorum; quandoquidem velut vmbra corpus actionum consequatur, ex earumque conditione ac lege pendeat, repudiandane sit, an amplectenda. Et, si quidem actiones honestæ sint, ac tuendæ corporis valetudini, aut hominum propagandæ speciei honestâ coniugij viâ necessariæ, aut certè permissæ ac licitæ, ijs adiuncta voluptas, earumque veluti comes ac pedisequa, non erit aspernanda; sed magnopere cauendum est, ne se intra necessitatis terminos minimè cohibeat, ac dominari velit, nè consilium ac rationem euertat, occupatæque mentis arce, temperantiam omnem, ac virtutem excludat. Tum verò non spectanda sola corporis voluptas; siue in suauis sensuum motione, ac titillatione; siue in vacuitate, ac carentiâ doloris sita sit; neque omnia referenda sint ad corpus, cum animus longè sit potior, animiqne delectatio infinito quodam spatio corporis titillationes omnes antecellat.

Est enim incomparabiliter animi vis potior atque excellentior, intelligendi & appetendi facultas acrior, interior, ac omni ratione præstantior, quàm sensuum corporis externorum, qui non nisi superficie tenus externa contingunt obiecta, neque se ad præterita vnquam, aut futura protendunt. Inter ipsa
obiecta

obiccta spiritalia, coelestia, sempiterna, & hæc corporea, terrena, præteruolantia, quæ in continuo fluxu labuntur, nulla quoque potest esse comparatio; non secusatque cum Deo rerum omnium Conditor nulla potest omninò creatura comparari.

Corporis omnia bona fluxa sunt, ac caduca, quæ nusquam consistunt, nec appetitum explent, aut satiant, sed immoderatà magis accendunt cupiditate. At Deus Opt. Max. summum animi bonum est, quo solo perniciatur, seque ipso melior, & omninò beatus efficiatur; extremus finis, ad quem omnia referantur, cuius assequutione denique conquiescat animus, ultra quem nihil omninò desideret, aut desiderare queat.

Ang. in
pl. 102.

Bonum tuum quære, ô Anima: est enim bonum aliud alteri, & omnes creaturæ habent quoddam bonum integritatis suæ, & perfectionis naturæ suæ; Summum bonum, hoc est tuum bonum. Quid ergo deest, cui summum bonum, bonum est? Sunt enim & inferiora bona, quæ alijs, & alijs bona sunt. Pecori quid bonum est, nisi implere ventrem, carere indigentia, dormire, gestire, vivere, sanum esse, generare? Tale tu bonum quæris? Cohæres Christi, quid gaudes quia socius es pecorum? Erige spem tuam ad bonum bonorum omnium. Contempta nempe voluptate corporis, ad animi delectationem, honestasque virtutum exercitationes, quibus illa gignitur, assurge, confer studium tuum ad Deum, quoad patitur hæc mortalis vita, Fide, Spe, Charitate, Religione, atque omni virtute

virtute consequendum, vt mox ab hac vita eodem clarè conspecto potiatis in beatam omnem æternitatem. Et si non possit ab ipsa virtute se iungi voluptas Animi, (voluptas certè corporis potest: nam in maximis doloribus perferendis præcipuè virtus elucet) tamen nec ipsa voluptas animi per se est expetenda. Non est ipsa merces, nec causa virtutis, sed accessio quædam, neque quia delectat, placet sed quia placet, delectat; fructus quidam est consequens honestæ vitæ, non ipsius scopus, ac finis.

Quin & ipsa solatia gratiæ infusæ diuinitus immissa, tanquam cælestium gaudiorum stillic quædam rorantes è cælo, non debent per se expeti, nec in ijs contemplationum atque orationum nostratum præfigendus est scopus; sed ad Deum impensius amandum, in cuiusque obsequio feruentius progrediendum, cum offeruntur, gratissimis animis excipi debent. Et quia ita comparati sumus, vt absque delectatione aliqua viuere nequeamus, cælestis appetenda est, nè terrestris præoccupet, & à recto virtutis tramite nos abducat. Esse quidem sine delectatione anima nunquam potest: Greg. 18.
mor. c. 2. Nam aut infimis delectatur, aut summis: & quantò altiori studio exercetur ad summa, tantò maiori fastidio torpescit ad infima. Quod vulgari prouerbio receptum est: Gustato spiritu delipit omnis caro.

Triplacis omninò generis sunt actiones, quæ à nobis suscipiuntur, quas consequi voluptas, ac delectatio solet: Ordinis naturæ duplices; aut ad corpus, aut ad animam pertinentes

inentes: Tum superioris ordinis tertiæ, quæ ad Dei gratiam, & amicitiam promerendam referuntur: exercitatio nimirum Theologiæ earum virtutum, & moralium infusarum, quæ quantò sunt superiores ac diuiniore, tantò puriorem, ac linceriorem pariunt animi delectationem; in quâ tamen ipsâ minimè est acquiescendum.

Quod attinet ad voluptates corporis, partitio illa; In naturales, & necessarias, quæ nec operâ, nec impensâ multâ expleantur; In naturales, nec tamen necessarias, quæ sint facillè parabiles, & terminatæ; Et inanes, quarum nec modus, nec finis ullus inueniri queat; vitiosa est: non solum, quia partem in genere numerat: nam prima partitio esse debuisset, in naturales, & inanes minimè naturæ congruentes; illæ verò naturales, aliæ necessariæ, aliæ non necessariæ; aliæ parabiles facillè, aliæ difficulter; Verum in eo maximè peccat diuisio, quod naturales omnes censendæ sunt necessariæ, & vice versâ, necessariæ, omnes naturæ congruentes; Non necessariæ autem, inanes, sine suo carentes ac destitutæ: Naturæ enim inserviendum est, & eius dumtaxat necessitati subueniendum, quod amplius est extra metam necessitatis, inane est, & nullo fine, ac termino restringitur: Vnde Sancti Viri, ait idem S. Gregorius, in omne quod agunt studiosissima intentione discernunt, ne quid plus ab eis naturæ suæ infirmitas, quam sibi debetur, exigat; ne sub necessitatis tegmine in eis vitium voluptatis excreseat. Aliud enim ex infirmitate, aliud ex tentationis suggestionem

stione sustinent, & quai quidam rectissimi arbitri inter necessitatem, voluptateque constituti, hanc consolando subleuant, illam premendo frænant. Praui autem necessitates ad vsum lux voluptatis retorquent.

Quare periculum in eo subest, ne voluptas necessitatis effigiem, ac laruam induat, eaque se contegat, ac de necessariâ & naturali, infinita prorsus, inexplebilis, & inanis euadat.

Hoc me docuisti confitebatur Deo Sanctus 10. Conf.
33.
Augustinus, vt quemadmodum medicamenta, sic alimenta sumpturus accedam. Sed dum ad quietem satietatis ex indigentia molestia transeo, in ipso transitu mihi insidiatur laqueus concupiscentia; Et quis est, Domine, qui non aliquando rapiatur aliquantulum extra metas necessitatis? Quisquis est, magnus est, magnificet nomen tuum; ego autem non sum, quia homo peccator sum.

Difficile sanè est, in ipsa quoque senectute, blandimentis voluptatis obistere: diuinus enim Plato escam malorum voluptatem appellat, quod cã homines capiantur, vt hamo pisces. Esca hæc in hamo dulcis aspectu, lethalis in gustu. Ac tametsi in senibus minor est sensuum titillatio, non tamen omnino nulla est, in ijs quoque viget igniculus, ac concupiscentia fomes, qui reprimi quidem potest, at penitus extinguere non potest. Et si procul velut abeuntes voluptates intueantur senes; tamen intuentur, ac magnopere verendum, nè blandissimis istis Dominis, si præsertim assueuerint à iuuentute, postlimi-
nio

nio velut reuocatis, aditum patefaciant, arcemque mentis, ac dominatum tradant. Luenes velut aduenientes ac blandientes voluptates quò propius, eò periculosius intuentur; maiorque omnino ijs adhibenda est cautio, cura, ac diligentia, vti maturè penitus arce, ac dominatu mentis excludantur.

Id nos monet Sapiens, quod Aristotelem quoque præcipere solitum ferunt, exitum potius, quàm introitum, aduentumque voluptatum intueamur, ad stimulum & caudam scorpionis potius, quàm ad faciem aduertamus.

Prou. 23.
v. 31. 32.

Ne insuearis vinum quando flarescis, cum splenderit in vitro color eius: ingreditur blande sed in nouissimo mordebit ut coluber, & sicut regulus venena diffundet. Fanus distillans labia meretricis, & viscidum oleo gustat eius: nouissima autem illius amara quasi absynthium, & acuta quasi gladius biceps. Voluptates venientes fucata specie blandiuntur, abeuntes autem penitentiam, & dolorem, confusionemque relinquunt.

Prou. 5.
v. 3. 4.

Duplex ea est præcipua voluptas corporis, quæ sensu quidem infimo gustu, ac tactu maxime terrestri, percipitur; sed acris, & vehemens imprimis, quam facilius omnino præseindas, atque à radice conuellas, quàm modereris, ac reprimas; ne se vitra necessitatis, ac rectæ rationis metas efferat; Vnà in cibi, potusque sumptione, ad sui cuiusque, & indiuidui conseruationem; altera ad humanæ speciei propagationem, permixtione sexus, ac concubitus usu; pertinens: cæteræ quæ oculis, auribus spiritalibus magis, & ad disciplinam

nam

nam accommodatis sensibus hauriuntur voluptates, non tam vehementes habent aculeos, quin facilius coercantur, ac negligantur. Omnium verò minimam vim habet odoratus; sed priores illæ cibi, potusque, ac rerum Venerearum, quæ sunt nobiscum pecoribus communes, quò maiores ac longiores sunt, eò deteriores, faciliusque mentem de suâ sede ac statu disturbant. Si quis hac voluptate coporistanta incitetur, quanta percipi potest maxima, certum est tam liue eum nihil agitare mente, nihil ratione, nihil cogitatione consequi posse.

Amicitiam cum Dauide coluit Berzellai Galaadites senex valde, id est octogenarius, & præbuit alimenta Regi cum Absalonem fugeret; hoc igitur interempto, rogatus est, à Dauide, secum rediret in Ierusalem, ac securus quiesceret. Et ait Berzellai ad Regem: *Quot sunt dies annorum via mea, ut ascendam cum Rege in Ierusalem? octogenarius sum hodie: nunquid vigens sensus mei ad discernendum suauem, aut amarum? iam delectare potest seruum tuum cibis & potibus: vel audire possim vltra vocem cantorum, atque cantatricum? quare seruus tuus sis oneri Domino meo Regi? Nempe qui sibi met iam ipse sit oneri, nullamque aliam, quàm de morte ac sepultura curam, ac cogitationem habeat.*

1. Reg. 19.

Iam quoad alteram voluptatem rei Venereæ; Cum Abrahamo fere centenariò, & Saræ nonagenariæ: frui intra eius anni curriculum promitteretur, risit Sara, non tam fidem abrogans, quàm rei nouitatem atque insolentiam obstupescens.

Gen. 18.
v. 11. 12.

obstupescens. *Erant autem ambo senes, pro-
neceque atatis, & desierant Sara fieri muliebria.
Quæ risu occultè, dicens: Postquam consenui, &
Dominus meus vetulus est voluptati operam da-
bo? Quæ de causa & Sancti Præcursoris parens
Elisabeth occultabat se mentibus quinque,
verecundiæ, & honestati consulens.*

Gal. 4.
v. 29.

Vbi vidit Sara Ismaëlem ludentem cum filio
suo Isaac, quem Iudum Apostolus persecuu-
tionem interpretatur, institit apud Abraham
maritum, Deo probante, eijceret ancillam,
& filium eius; nempe si caro spiritui blan-
diatur, si iocis illecebrosis alliciat, ac lenoci-
nijs demisceat, mox abijcienda est, ac fu-
gienda, ne suo complexu spiritum enecet. Ut
Ioab Amasam complexans transfodit; ac in-
teremit; sic blandissime Domine voluptates,
dum nos astringunt, enecant, suo nos complexu
præfocant, atque interimunt.

Habenda igitur gratia senectuti, quod eius
utriusque voluptatis cupiditatem nobis im-
minuerit. Est omnisea voluptas res humilis,
& vilis, ministerio, atque usu sensuum, ac
membrorum vitium proueniens, moxque
ipso temporis lapsu præterfluens, sui fasti-
dium generans, non sine admixta quadam
turpitudine ac fæditate, inimica ferè rationi,
perstringens mentis oculos, atque omne ani-
mi lumen extinguens, nisi summa adhibeatur
cura, ac moderatio, ut necessitati magis, quàm
voluptati, consuliatur.

Non sit harum voluptatum tanta quasi ti-
tillatio in senibus, sed nec desideratio qui-
dem; Nihil autem molestum, quod non de-
sideres.

sideres. Bene Sophocles, cum ex eo quidam iam confecto ætate quæreret; vtereturne rebus Veneris? Dij meliora, inquit, libenter verò istinc, velut à Domino agresti, ac furioso profugi: cupidis enim rerum talium odiosum fortasse & molestum est carere; satiatis verò, & expletis iucundius est carere; quàm frui. Quamquam non caret is, qui non desiderat, & hæc non desiderare longè sanè iucundius est, quàm frui. Tum verò beatissimum illum censeo, qui ne primoribus vnquam labris voluptates istas degustarit, qui solius necessitatis rationem habuerit, nunquam ipsas per se voluptates expetierit: hoc enim postulat Christiana disciplina, vt ipsi etiam necessitati detrahamus aliquantulum, ac potiozem omnino spiritus, quàm corporis, valetudinisve, rationem habeamus.

Quâ de re præclare quodam sermone Bernardus aduersus obseruatores ciborum, morum neglectores: Non Hippocratis, aut Galeni sententiam debui proponere vobis; aut certè de scholâ Epicuri; Christi discipulus sum, Christi discipulis loquar, corporis altere voluptatem, altere bonam habitudinem præfert; Christus, meus Magister, vtriusque rei contemptum prædicat. Animæ in corpore vitam iste vnde iustentet, ille vnde & deleatet, inquit, atque inquirere docet; Saluator monet, & perdere; Qui amat animam suam, perdet eam; siue ponendo vt Martyr; siue affligendo vt pœnitens: Quamquam genus Martyrij est, spiritu facta carnis mortificare, illo nimirum, quo membra caduntur ferro,

Serm. 30.
in Caut.

E

horrorq

horrore quidem mitius, sed diuturnitate molestius.

Ad Gal. 5.
v. 24.

Sanè qui sunt Christi, carnem suam crucifixerunt cum uirgīs & concupiscentiis. Iamque à primâ ætate senes mortificare membra sua, & Christi Crucis asperitatem, omni contemptâ voluptate, ut animi sui solatium diligere, & excolere consueuerunt. Super saluam & speciem dilexi sapientiam; Quamto magis super voluptatem, ac turpitudinem?

Sap. 7.
v. 10.

Fateor tamen id quod res est, aduersus has voluptates à natura velut insitas multò maius est præsidium in Diuina gratia, quam in ætate prouecta: Neque suæ senectuti, atque anteaquæ vitæ quisquam præfidere debet, esto frigidus obustat circum præcordia sanguis, nemo tamen immunis est ab eius cupiditatis periculo, nisi Diuina gratia muniatur.

Daniel. 13

Neque desunt exempla in sacris litteris præclarissima: Duo illi nequissimi senes Babylonij, qui in Susannæ castissimæ concupiscentiam exarserant, quorum cariosam, putrescentemque libidinem castissima Danielis adolescentia condemnauit. Sed nihil illustrius est Salomone, cuius, cum iam esset senex, deprauatum est cor, per mulieres alienigenas &c. Filii itaque copulatus est Salomon ardentissimo amore, fueruntque ei uxores quasi reginæ septingentæ, & concubinae trecentæ: & auerterunt mulieres cor eius.

1. Reg. 11

Ad ann.
Chri. 389.
fol. 506.

Annum ætatis agebat sexagesimum quintum Gregor. Nazianzenus, cum ex hac vita migravit, ex Illustrissi. Cardin. Baronij calculo, corpore quidem integro, sed assiduâ ægritudi-

agritudinibus debilitato, & cum Arianzi degeret in rure paterno, euocatusque esset cum compluribus Episcopis ad Olympiadis nuptias, excusat se ad V. Clariss. Arisum scribens, quod podagræ morbo laboraret, de quo alijsque morbis sæpe lamentatur in ijs versibus, quibus suam senectutem, affixus lecto, velut cygneis cantibus solabatur.

Sed maximè inuoluitur in carnem suam, cuius aduersus castitatem aculeis à dæmone præcipuè vexabatur: Non improbitati tandem tuæ, impudentiæque finem impones? non spiritui, ac senectuti iam canes stulta, miseraque te submittes? Et mox: quocirca verere me tandem, ac libidinem istam, petulantiamque compesce; nec in animæ meæ perniciem perpetuo furore debacchare: alioquin testor fore, vt te acerrimè oppugnem, omni-que dolorum genere frangam, atque cadat se imbecillior me reddam: At quibus remedijs eandem insultantem coercere soleret, mox subdit: Venite iam, & quidem magna copia, scelerum expiatrices lacrymæ: veni laboriosum tam mentis, quam corporis perur-gilium, vt flammæ meæ ardorem minuatis, fetidamque vitiorum pūtredeinem abster-gatis. Venter satietatem ableget: genua humi fixa obrigescant, cinisque cibi loco sit: asperimus saccus mollia membra vndique tegat, vexataque animæ suppetias ferat. Veni tristis cura, carnis domitrix, futura supplicia mihi semper ob oculos ponens. Atque hæc quidem stoliditati meæ, vecordięque medicamenta ipse adhibebo. Et alibi cum deplorat

miserias animæ suæ: Ego in hac canitie corpus laniô, oculos premo, diurnis nocturnisque curis ter miseram animam conficio, ut eam flammam extraham: nec sic quidem tamen, nisi admodum ægrè, corpus in potestate teneo.

Denique multis irritò conatu remedijs adhibitis ad Deum conuersus: Senectutem, quæso, meam, optime Deus; canumque hoc caput serua, vitæque finem optatum concede. Carminè de rebus suis conqueritur cogi se in senectute experiri, quæ iuuenis nullo negotio libi visus fuerat superasse. Nam illibatam à pueritia castitatem, virginitatemque seruauerat, & senex hisce facibus libidinis, ac flammis mali Dæmonis arte succendebatur; sed quæ lacrymis, vigilijs, ieiunijs, orationibus, incendioque maiore diuini amoris, incendia carnis extingueret.

Epist. 99.

Addam & illud. Cum in propinqua villa Valentinianus quidam, nobilis, loci Dominus, lasciuientes fæminas in oculos Gregorij produxisset, ipse sibi timens, loco cessit, & ad Valentinianum inter alia scripsit: Multò melius erat tabula publicè proposita (proscriptionis scilicet) nobis secessionem indicere, quàm per mulieres, quas è regione nostri collocasti, vitæ grauitatem, & sanctitatem intercidere. At, nisi hoc dictum audax sit, nos quoque per Euam è paradiso expulisti. Nimirum in hoc bello fugere, vincere est; omnis salus in fuga, ac pedibus sita est.

Præterire non possum, quæ de loquacitate ab se compescenda tradit, quod vitium sen-

Auti

stuti quoque solet esse familiare. Nunc, inquit, & morbo affectus, & senectute fractus, ac debilitatus, in aliam calamitatem incidi, in domitam linguam, præcipitique loquendi celeritate volubilem habens, quæ me inuidi hostis mei manibus semper tradidit, innumerisque incommodis affecit. At quam coërcuit disciplina? perpetuo quadraginta dierum silentio, quo completo, sic Christum carmine compellat: Tibi linguam meam deuinxisti, & eam nunc soluo; quod vtrumque vti pie faciam, te supplex rogo, & obsecro. Loquar quæ loqui conuenit: quæ autem nefas est loqui, ne animo quidem, & cogitatione complectar. Militia sanè est vita hominis ad ipsam usque senectutem decrepitam, ad usque mortem, quæ demum, cum obata fuerit, consummatam adferet victoriam, præmiumque ac triumphum victori decernet merito.

Quod igitur apud Catonem sequitur: At illa quantisunt, animum, tanquam emeritis stipendijs libidinis, ambitionis, contentionis, inimicitiarum, cupiditatum omnium, secum esse, secumque, ut dicitur, vivere, si verò habet aliquod pabulum studij, atque doctrinæ, nihil est otiosa senectute iucundius: Id, inquam, aliqua eget castigatione: Non enim senectute, sed morte finiuntur stipendia victiorum, aut virtutum, quibus quis à prima se ætate dedit. Non senectus, sed mors denique receptui canit, victoribus præmia, victis supplicia, Diuinæ Iustitiæ velut administrata, conignans. Et quis non optet nulla vnquam victiorum stipendia meruisse, sed in

virtutis, atque innocentiae castris à primâ pueritiâ continenter militasse? ad hæc certè maturè transfugisse commutatione vitæ, ac pœnitentiæ salutaris susceptione, desertis profligatisque vitijis?

Iam in senectutē, si quis secum esse, secumque vivere velit, videat ne sit cum homine nequam, hominē doloso, ac maligno potius, quàm cum Deo esse, ac cum eo versari Cœlitibusque, desideret; & ad eum impensius cognoscendum, & amandum ingenij sui vires omnes, studiumque doctrinæ, atque industriz conferat. Quod si doctrina sæcularis tantum affert lætitiæ, ac iucunditatis otiosæ senectuti, quantum afferet sacrarum ac diuinarum litterarum tractatio, de quibus iam ante dictum est? Iure merito Machabæi:

1. Machab.
12: 2:

Non cum nullo hominu indigeremus, habentes solatio sanctos libros, qui sunt in manibus nostris; Quos duplo iam auctos habemus accessione noui Testamenti, doctissimis veterum ac recentium Authorem commentarijs illustratos.

Magnopere sanè delectat operum naturæ contemplatio, vt se agriculturæ delectatione fatiari posse, neget Cato, eamque vnâ suæ senectutis requiem, & oblectamentum ducat, de quâ & Regius Psalter: *Quia delectasti me Domine in factura tua: & in operibus manuum tuarum exultabo. Quam magnificata sunt opera tua Domine. Nimis profunda facta sunt cogitationes tue.* At quanto hæc iustius dicentur de operibus gratiæ, ac summis mysterijs Redemptionis humanæ, Incarnationis Filij Dei, eiusque

Psal. 91.
v. 5. 6.

eiufque vitę ſanctiſſimę, Paſſionis, ac mor-
tis oeconomia; de Reſurrectione, Aſcenſio-
ne in Cęlos, miſſione S. Spiritus, aduentu
ſupremo ad iudicium, alteraque vita ſempi-
ternă! Horum myſteriorum attenta conſi-
deratio, quam immenſum pię ſenectuti ſo-
latium, ac gaudium afferet! quanta mentis
exultatio ex certâ Spe, & expectatione futu-
rę beatitudinis, aſiduâ veluti cogitatione
pręguſtatę! *Quis ſimilis tui in fortibus Domi-
ne? quis ſimilis tui, magnificus in ſanctitate, ter-
ribilis atque laudabilis, faciens mirabilia!* Ve-
rum hæc alteri tractatui ſeruentur.

Exod. 15.
v. 11.

Agrorum, & hortorum excolendorum
purę, & caſtę voluptates, non alienę fue-
runt à priſcis illis ſenibus Anachoretis, atque
vt vnum proferam locum; Legimus in vita
S. Hilarionis; cum Fratribus dixiſſet inſtare
diem dormitionis S. Antoni; & pernoctem
noctem in ipſo, quo deſunctus fuerat, loco,
à ſe illi debere celebrari; tribus poſt diebus
per vaſtam, & horribilem ſolitudinem; tan-
dem ad montem altiſſimum eum perueniſſe;
reperit ibi duobus monachis Iſaac, & Peta-
ſiano; quorum Iſaac interpres Antoni fue-
rat. Saxeus, & ſublimis mons per mille cir-
citer paſſus ad radices ſuas aquas eximit,
quarum alias arenę ebibunt, alię ad inferio-
ra delapſę, paulatim riuum efficiunt; ſuper
quem ex vtraque ripa palmę innumera-
biles, multum loco & amoenitatis, & commodi
tribuunt. Videres ſenem huc atque illuc cum
diſcipulis B. Antoni diſcurrere: Hic dicebant;
plallere, hic orare, hic operari, hic ſolus re-

fidere solitus erat. Has vites, has arbusculas ipse plantauit: illam areolam manibus suis ipse composuit: hanc piscinam ad irrigandum hortulum multo sudore fabricatus est; istum farculum ad fodiendam terram pluribus annis habuit. Iacebat in stratu eius, & quasi calens adhuc cubile deosculabatur: Erat autem cellula non plus mensuræ per quadrum tenens, quam homo dormiens extendi poterat. Præterea in sublimi montis vertice, quasi per cochleam ascendentibus, arduo valde nisu duæ eiusdem mensuræ cellulæ viscebantur, in quibus venientium frequentiam, & discipulorum suorum contubernium fugiens, commoratus est. Verum hæc in viuo excisæ saxo, ostia tantum addita habebant.

Postquam autem ad hortulum venerant: Videtis, inquit Isaac, hoc pomarium arbusculis consitum, & oleribus virens? Ante hoc ferme triennium, cum onagrorum grex vastaret, vnum è ductoribus eorum stare iussit, baculoque tundens latera: Quare, inquit, comeditis, quod non seminastis? Et exinde, exceptis aquis, ad quas potandas ventitabant, nunquam eos nec arbusculam, nec olera contigisse.

Hortum hunc Antonij miraculo nobilitatum, & crebris ad Deum precibus consecratum, longè ego Cyri minoris Regis Persarum agro consito prætulerim; et si & proceritates arborum, & directi in quincuncem ordines, & humus subacta, atque pura suauissimos è floribus efflans odores, admirandam reddiderunt Regis eius diligentiam, ac solertiam;

tiam; à quo essent illa dimensa, ac descripta.

Voluptates agricolarum, ait Cato, nec vlla impediuntur senectute, & ad sapientis vitam proximè videntur accedere: habent enim rationem cum terra, quæ nunquam recusat imperium, nec vnquam sine vsura reddit quod accepit, sed alias minore, plerumque maiore cum scœnore. Nempe si terra bona est, & optima, diligenter excolta, mortificationis aratro proscissa, non iuxta viam à prætereuntibus proculcata, aut petrosa saxis obfita, aut spinis dumetisque cooperta, præfocantibus sementem Patrisfamilias; afferatque aut trigelimum fructum virtutis inchoatæ, aut sexagelimum prouectæ, aut planè consummatæ centelimum. Nec difficile sit quæ Cato subiicit de terræ vi, ac natura; cum gremio mollito, ac subacto semen accipit &c. ad Christi Domini parabolas accommodare; & de vitæ maximè, ac palmitibus, quibus sese, & Apostolos suos comparat, quam serpentem multiplici lapsu & erratico, ferro amputans coercet ars agricolarum, ne siluescat sarmentis, & in omnes partes nimia fundatur: Quod ad mortificationis studium in omni quidem ætate, sed adolescentiæ præsertim ac iuuentutis vsurpandum pertinet. Vua succo terræ, & calore solis augescens, adolescentiam, ac iuuentutem adumbrat, quæ primò est peracerba gustatu; dein maturata dulcescit, vestitaque pampinis nec modico tepore caret, & nimios solis defendit ardores, symbolum honoratæ, ac probatæ senectutis;

nectutis, qua quid potest esse cum fructu letius, tum aspectu pulchrius?

Hieron. in
vita Malc.

Aliud in eremo spectaculum, sanè pulchrum, & se dignum reperit Malchus, senex Monachus. Aspicio, inquit, formicarum gregem angusto calle feruere, ferre onera maiora quam corpora, aliæ herbarum quædam semina forcipe oris trahebant, aliæ egebant humum de foucis, & aquarum meatus aggeribus excuidebant; illæ venturæ hyemis memores, nè in adfecta humus in herbam horrea verteret, illata semina præcidebant; hæ luctu celebri corpora defuncta deportabant, quodque magis mirum est, in tanto agmine egrediens non obstabat intranti, quin potius si quam vidissent sub tasce, & onere concidisse, suppositis humeris adiuuabant.

Prou. 6.
v. 6.

Inde recordatus Salomonis ad formicarum solertiam nos inittentis, & pigras mentes tali exemplo suscitantis: Cæpit ædere captiuitatis, & monasterij cellulas quærere, & formicarum illarum similitudinem desiderare, ubi laboratur in medium; cumque nihil cuiusquam proprium sit, omnium omnia sunt. Verum à Catone longius aberramus.

Quid de pratorum viriditate, aut arborum ordinibus, aut vinearum oliuetorumve specie dicam? breui expediam. Agro bene culto nihil potest esse nec usu vberius, nec specie ornatius: ad quem fruendum, non modo non retardat; verum etiam inuitat, atque allecat senectus. At qui mentis oculos habet interna fidei luce collustratos, pulcherrimarumque aspectu virtutum recreatos, quanto iustius dixerit:

dixerit: Animo bene culto nihil potest esse ornatus, vitijs expurgato, virtutibus confito, quem ætas certè postrema sibi vindicat. Mementote, ait Cato, eam melaudare senectutem, quæ fundamentis adolescentiæ constituta sit, ex quo efficitur id, quod ego magno quondam cum assensu omnium dixi: Miseram esse senectutem, quæ se oratione defenderet. Non cani, non rugæ repente auctoritatem afferre possunt; sed honestè acta superior ætas, fructus carpit auctoritatis extremos. Quanquam Christianus senex nihil magnopere eam apud homines auctoritatem æstimat, conscientiæ testimonio, ac Dei in se benevolentia contentus: leuia planè sunt, & contemptibilia, quæ Cato ducit honorabilia, salutare, appeti, decedi, assurgere, deduci, reduci, consuli quæ & apud nos, & in alijs ciuitatibus, vt quæque optimè morata est, ita diligentissimè obseruantur. Officia sunt hæc iuuenum bene moratorum, à senibus negligenda, non magnopere per se vquam expectenda.

At sunt morosi, & anxij, & iracundi, & difficiles senes; si quæras, etiam auari, quod commemorat etiam Lyricus Poëta:

Multa senem circūueniunt incōmoda; vel quod Quærit, & inuentis miser abstinet, & timet vti; Vel quod res omnes timide, geli sequi ministrat, Dilator, spe longus, iners, auidusque futuri, Difficilis, querulus, laudator temporis acti. Se puero, censor, castigatoremque minorum.

Sed hæc morum vitia sunt, non senectutis. At morositas tamen, & ea vitia, quæ dixi, habent

habent aliquid excusationis, non illius quidem iustæ, sed quæ probari posse videatur. contemni se putant, despici, illudi; præterea in fragili corpore odiosa omnis offensio est, quæ tamen omnia dulciora sunt, & bonis moribus, & artibus: idque cum in vita, tum in scena intelligi potest ex ijs fratribus, qui in Adelphis sunt, quorum in altero duritas, in altero comitas. Sic serres habent: ut enim non omne vinum, sic non omnis ætas coacescit vetustate; quanquam & habent vina generosas suas sæces. Seueritatem in senectute probō, sed eam, sicut alia, modicam; acerbitem nullo modo: Auaritia verò senilis quid sibi velit, non intelligo: potest enim quidquam esse absurdius, quam quò minus viæ restat, eò plus viatici quærere?

Sed diffidunt sibi senes, eiusque ætatis propria est timiditas; nullam tamen excusationem, quæ probari possit, his vitijs tribuit Christiana disciplina, quæ à prima ætate bellum illis inlinox, atque in extrema penitus deuicisse, ac debellasse debuit. Non sunt Christiani senes morosi, iracundi, acerbi, sed comes ac benigni, qui senectutem sine querela traducant, adeoque gaudeant contemni, despici, illudi, ut ad aliquam ducis sui Christi Domini opprobriorum partem attingant. Tales sunt Christiani senes, quales optat Apostolus ad Titum sobrij, casti, prudentes, integri in fide, in dilectione, in patientia; qui, si minus ieiunijs possunt, orationibus, & eleemosynis profusioribus ad mortem se comparant; quibus nulla odiosa est nec in animo, nec in corpore

Ad Tit. 2.
v. 2.

pore offensio; Sed quò minus viæ restat, propiusque ad metam accedunt, eo virtutum incitatio gressu, ac bonorum operum cursu feruntur.

Prouerbij vulgaris locum obtinet: Bis pueri senes; quod tamen pio, ac sano sensu repudiandum non est, si per pueritiam, atque infantiam, humilitatem intelligamus; qua de re D. Augustinus in Psalm. 112. Nostis, fratres, & sapissimè audistis in Euangelio Dominum dicere: Sinite pueros venire ad me; talium est enim regnum Cœlorum. Et iterum: Si quis non receperit regnum Dei sicut puer, non intrabit in illud. Et multis alijs locis Dominus Deus noster per singulare humilitatis exemplum, superbiam veteris hominis, ad inno- uandam humiliter vitam, similitudine puerilis ætatis accusat. Quapropter, Charissimi, cum cantaria auditis in Psalmis: Laudate pueri Dominum; ne arbitremini ad vos istam exhortationem non pertinere, quia iam corporis pueritiam supergressi, vel iuuenili decore virescitis, vel senili honore canescitis: omnibus enim vobis dicit Apostolus: Nolite effici pueri sensibus, sed malitia paruuli estote, vt
Marc. 10.

Sint igitur bis pueri senes, non sensuum imbecillitate, aut rationis obscuritate; sed innocentie puritate, malitiæ omnis, & duplicitatis vacuitate; sint sinceritate, & simplicitate pueri, absque vlla præsumptione superbiæ: Nam quæ malitia maximè paruulos nos vult Apostolus, nisi superbia? ipsa enim de vana granditate præsumens non sinit homi-
1. Cor. 13.

nem

nem ambulare per arctam viam, & intrare per angustam portam. Pueri autem faciliè intrant per angustam portam.

Quid est; Laudate pueri Dominum ex hoc, laudate senes & vsque in sæculum? Quia senectus nostra albeïcet quidem canis sapientiæ, sed non carnis vetustate marcescet, aut quoniam hoc loco humilitatem potius videtur significare pueritiã, cui contraria est vana & falsa superbię magnitudo, & ideo Dominum non nili pueri laudant, quia superbi eum laudare non norunt. Sit senectus vestra puerilis, & sit pueritia senilis, id est, vt nec sapientiã vestra sit cum superbiã, nec humilitas sine sapientiã, vt laudetis Dominum ex hoc & vsque in sæculum. Tales omnino probandi, atque optandi senes, humiles & prudentes in Christo, diu noctuque in eius cerebrandis laudibus occupati.

Dicebat suis sanctus Antonius: Vna est ergo ratio vincendi inimicum, lætitiã spiritualis, & animę. Dominum semper cogitantis iugis recordatio. Hęc eadem vna ratio foeliciter ad extremam vsque decrepitudinem traducendę senectutis. Nihil magis aduersum valetudini, ac senectuti, quàm animi mœror, & torpor. Melancholia omni ætati noxia, sed præcipuè senectuti, cui familiarior esse solet. Comitas, hilaritasque mixta senectuti, vt grauitas iuuentuti, maximum est ornamentum.

Quarta restat causa, quę maximè angere, atque sollicitam habere nostram ætatem videtur, appropinquatio mortis, quę certè à senectute

neſtute non poteſt longe abeſſe. Cum in
cæteris variorum euentuum, ac morborum
generibus mors poſſit euitari, neque neceſſi-
tate conſequatur; ſeneſcentem, quæ neceſſa-
rius ineuitabilis que morbus eſt, & defeſtio
naturę ſuâ ſponte fatiſcentis, non poteſt non
aliquando, imò breui conſequi: Sed ô miſe-
rum ſenem, qui ſe ad mortem in tam longâ
ætate non compararit! non dico, non viderit
contemendam eſſe, vt Cato, cuius ratioci-
natio ſanè claudicat, & longè abeſt à veritate.
Aut mors, ait, negligenda eſt, ſi omnino extin-
guit animum; aut etiam appetenda, ſi aliquò
eum deducit, vbi ſit futurus æternus. Quid
igitur timeam, ſi aut non miſer poſt mortem,
aut beatus etiam futurus ſum? Atqui tertium
certè nihil inueniri poteſt; Imò maximè, vt
æternus ſis, neque tamen beatus, ſed extremâ
omni miſeriâ cumulatus. Reformidanda mors,
ſi aliquò eum deducit vbi ſit futurus æternus,
ſummâ atque omni miſeriâ (quę mors ſecun-
da, aut deterior morte) mactatus.

Vt proborum, improborumque diſpar eſt
vita; ita & vitæ quoque diſpar exitus, morſi-
que diuerſa eſt, & quę mortem conſequitur
æternitas. Non ſunt ijdem fines bonorum, &
malorum; vt is, qui ex virtute vitam tradu-
xit, æternâ mercede cæleſtis vitæ eſt perfrui-
turus; ita qui ſe flagitijs, ac ſceleribus obſtrinxit,
æternum apud inferos ſupplicium luitu-
rus. Atque, vt præclare Socrates diſſerebat,
duz ſunt vię, duplicesque curſus animorum &
corpore exeuntium: Nam qui ſe ſummis vi-
tijs contaminant, & ſe totos libidinibus
dedide;

dediderunt, ijs deuium quoddam est iter, seclusum à concilio Beatorum; qui autem se integros castosque seruarunt, quibusque fuit minima cum corporibus contagio, suntque in corporibus humanis vitam imitati Beatorum, his ad illos, quibus animo iuncti fuerunt, facilis patet accessus. Verum quis tantum sibi arroget, ut integrum se ac castum, neque ullâ corporis contagione maculatum opinetur, nullâ egere expiatione, quin mox obitâ morte in Beatorum domicilium, ac consortium recipiatur?

Prima sunt hæc Christianæ Catecheseos rudimenta; Animos piorum, qui in Dei gratiâ, & amicitia exceſſerint, ac, si quas fortè maculas peccatorum pro mortali huius vitæ fragilitate contraxerint, maturè susceptis à sepanis, aut alijs benefactis, aut Diuina indulgentia penitus absterferint, continuò in cælum Empyreum, ad Dei Beatorumque concilium recipi; at sceleratorum animos, qui se peccato læthali contaminarint, atque à Dei gratia, & beneuolentia alieni è corporibus abierint, in Orcum, ac Tartarum detrudi sempiternis flammis, ac damnatorum pænis cruciandos; Tertium quoddam esse genus animorum, qui tametsi nullo grauiore obstricti crimine, neque alieni à Diuina amicitia, sed tamen non planè puri, casti, atque integri, non planè expiatis maculis omnibus leuium delictorum, aut grauiorum antea quoad culpam indultorum, exceſſerint, ijs patere purgatorium carcerem, quo tantisper in pænis, ac tormentis detineantur, dum

dumque planè emundati, Deique, ac Beatorum conspectu non indigni, censeantur.

Vbi supremus iudicij dies aduenerit, totiusque orbis consummatio, ac conflagratio fuerit expleta, tum cessabit hic carcer, atque ignis purgatorius, resumptisque corporibus Beati, ac dammati quoque reuiuiscunt, de supremo die sempiternam vitæ, aut mortis æquissimi Iudice Christo Domino sententiam excepturi. Hec si Cato perspecta fuisset, aliud, opinor, orationis genus sequutus esset; neque digressionè opus habuisset, quam, cum ea pertineat ad mores, in ea persequenda eius hic quoque vestigijs insistemus.

Quis est tam stultus, quamuis sit, adolescens, cui sit exploratam, se ad vesperum esse victurum? quin etiam ætas illa multo plures, quàm nostra, mortis casus habet. Facilius in morbos incidunt adolescentes, grauius ægrotant, tristius curantur. Itaque per pauci veniunt ad senectutem: quod nisi ita accideret, melius, & prudentius viveretur: mens animi, & ratio, & consilium in senibus est, qui si nulli fuissent, nullæ omnino ciuitates essent: Nulli certè Ordines Religiosi constanti disciplina stabiliti. Si quaque in ciuitate, aut Religiosa familia, numerum quis inire velit, pluresne senes, an ante adeptam senectutem iuuenes, atque adolescentes, mortem obierint, horum longè videbit excedere multitudinem.

At sperat adolescens diu se esse victurum, quod sperare idem non potest senex. Insipienter sperat: quid enim est stultius, quàm incerta pro certis habere, falsa pro veris? At senex

F

ne quod

ne quod speret quidem habet (habet omnino beatam æternitatem) At quoad hanc vitam, eo est meliore conditione quam adolescens; nam id quod sperat ille, hic consequutus est. Ille vult diu vivere: hic vixit diu. Quamquam, o Dij boni, quid est in hominis vitæ diu? Da enim supremum tempus: expectemus Tartessiorum Regis ætatem: fuit enim, ut scriptum video, Arganthonius quidam Gadiibus, qui octoginta regnavit annos, centum viginti vixit. Sed mihi ne diuturnum quidem quidquam videtur, in quo est aliquid extremum: Cum enim id advenit, tunc illud, quod præterijt, effluxit; tantum manet, quod virtute, & rectè factis consequutus sis. Horæ quidem cedunt, & dies, & menses, & anni, nec præteritum tempus reuertitur, nec quid sequatur sciri potest.

In eandem sententiam plenius S. Augustinus in illa verba psalmi trigelimi: *Accelera ut eruas me*. Ad hoc enim positum est (scilicet verbum *accelera*) ut hoc totum, quod nobis videtur quamdiu voluitur sæculum, intelligas punctum esse, Non est diu quod habet extremum. Ab Adam usque ad hodiernum diem, peractum est, & multò utique plus peractum est, quam restat peragendum. Si adhuc viveret Adam, & hodie moreretur, quid ei prodesset tam diu esse? tamdiu vixisse? Ergo celeritas hæc quare? quia transuolant temporā, & quod tibi tardum est, in oculis Dei breue est.

Ceterum, quod cuique temporis ad vivendum datur, eo debet esse contentus; Neque enim

enim histrioni, vt placeat, peragenda fabula est, modò, in quocumque fuerit actu, probe-
tur; neque sapienti vsque ad Plaudite venien-
dum: Breue enim tempus ætatis satis est lon-
gum ad bene honesteque viuendum; hoc est,
ad beatæ æternitatis fructum, vt ante dixi,
demetendum. Non refert quamdiu, sed quàm
bene vixeris; modò beatę portum æternitatis
teneas, non magnopere refert, an diu tempe-
state iacteris, an recto cursu, breuissimo pro-
ueharis in portum. Ex alterâ consequente
vitâ sempiternâ, summè aut beatâ aut misera,
quæ ad illam aditum patefacit, eiusque velut
exordium est, mors diludicanda est, ac discer-
penda. Mors peccatorum pessima, quæ in
abyssum inferni, secundæ mortis, ac miseria-
rum omnium præcipitat: Mors Sanctorum
pretiosa, quâ cælestis æternitas comparatur,
quæ nos Dei, ac Beatorum conspectui sistit,
atque æternum adiungit eadem communi fæ-
licitate perfruituros.

ANNA 3
841.12.01

Quis sit moriendi sensus, cum ad exiguum
tempus duret, præsertim seni iam exhausto,
sitne ea secundum naturam corporis animique
dissolutio, an aduersante ac repugnante natu-
râ? facillene fiat, an ægrè adhibitâ vi? an sicut
cumaquæ multitudine flammæ vis opprimi-
tur, sic moriantur iuuenes; senes autem sicut
sua sponte consumptus ignis extinguitur; aut
quali poma ex arboribus, si cruda sunt, vi
auelluntur; si matura, sponte decidunt: sic
vitam adolescentibus vis auferat, senibus matu-
ritas: nihil magnopere disquirendum existi-
mo. Sed viuendi finis est optimus, cum inte-

gramente; certis que sensibus, opus ipsa sunt
eadem, quæ coagmentauit; natura dissoluit.
Vt enim ædificium, ut ædificium, idem destruit
facillimè; qui constituit; sic hominem eadem
optime, quæ conglutinat, natura dissoluit.
Nam omnis conglutinatio recens, ægrè, in-
ueterata, facillè ditellitur; ita fit, ut illud
breue vitæ reliquum temporis, nec auidè appen-
dendum sevis, nec sine causâ deserendum
sit: Quæ Pythagoræ iniussu Impera-
toris, id est, Dei, de præsidio & statione
vitæ decedere.

Quid enim? malum est mori naufragio; &
bonum est mori febre? siue inde, siue inde
quis moriatur; quære qualis est qui moritur;
quod post mortem iturus est; non vnde de vici-
exiturus. Quacumque occasione hinc exituri
sumus. Vnde cumque mors pro acciderit, bo-
na est. Nouit Deus quid agat: Tu time; &
bonus esto. Vnde cumque voluerit ut exas
hinc; paratum te inueniat. Inquilinus enim
es; non possessor domus: locata est enim tibi
domus; non donata; et si nolis, migrabis;
non tali conditione accepisti, ut quasi tempore
certa tibi sint. Quid dixit Dominus Deus
tuus? Quando voluero, cum dixerò: Migra;
paratus esto. Expello te de hospitio, sed dabo
domum. Inquilinus es in terra; eris possessor
in celo. Hec aptissime S. August. Commo-
randi nobis natura diuersorium; non habitan-
di dedit. Tanquam ex hospitio; non tanquam
ex domo discedendum.

Meminisse oportet mortem primæui pec-
cati penam esse; & non ipsi Deo primo velut
authori

Ex Angu.
in ps. 148.

authori tribuendam. Cuiusmodi futurus sit
sensu post mortem; & quæ mortem exce-
ptura sit æternitas; id maxime laborandum;
ac planè hoc meditatum ab adolescentia de-
bet esse, mortem non ut negligamus, sed ma-
ximâ curâ, ac piâ sollicitudine expectemus, ad
eamque nos omni virtutum studio compa-
remus, sine quâ meditatione ac præparatione,
tranquillo esse animo nemo potest. Morien-
dum enim certè est; & incertum, an eo ipso
die; mortem igitur omnibus horis suspenden-
tem timens, quis possit animo consistere? Is
certè, qui in Dei timore, ac cultu sanctè vitam
traduxerit, quem nullius grauioris criminis
reâ conscientia coarguerit, qui tamen non
suis recte factis, sed Christi Domini meritis
innitatur; qui morti ipsi cogitatione semper
prodeat obuiam; ad eamque omni loco, ac
tempore excipiendam Dei gratiâ sese præmi-
nuerit, assiduâ cum virtutum Christianarum
exercitatione, tum pia Sacramentorum visi-
tatione.

Merito illud Sancti Thomæ Aquinatis di-
ctum laudatur; stultissimum hominem esse,
qui se in statu peccati lethalis lecto, ac quieti
committat; Nam ea ipsa fortè nocte contin-
get eum emori, & ad Dei tribunal sisti: stul-
tissimus sanè, qui vel momento, in eo statu
velit esse, in quo nolit emori; qui mox illud
commissum crimen, cum Dei gratiâ, quæ
nunquam deest, elcito contritionis actu,
non expunxerit, & cum primum licuerit,
Pœnitentiæ Sacramento, ac lacrymis non pla-
nè diluerit.

Eccl. 7.
v. 18.

Quis nisi stultissimus, in hoc æternæ mortis, ac damnationis discrimen conijcere se, in eoque, non dicam noctem, aut horam, sed punctum temporis hærare velit? *Ne impiè agas multum: Quasi esse stultus, ne moriaris in tempore non ideo.* Sed in plerisque Christianis hodie vacillat fides, odiosaque omnis mortis, atque æternitatis memoria est. Nunquam ego mortem non timendam dixerim, quam sanctissimi quique viri non mediocriter reformidarunt. De Sancto Hilarione narrat Hieronymus; Cum modicus calor teperet in corpore, nec præter sensum quidquam viui hominis superesset, tamen apertis oculis loquebatur: Egrederere, quid times, egredere anima mea, quid dubitas? septuaginta prope annis seruisti Christo, & mortem times? In quæ verba spiritum exhalauit. Si mortem timet Hilarion, quis senex non timeat?

Memorable est, quod de S. Augustino refert Possidius, cuius textum hic inferam. Dicere nobis inter familiaria colloquia consueuerat; Post perceptum baptismum, etiam laudatos Christianos Sacerdotes, absque dignâ, & competenti penitentiâ exire de corpore non debere. Quod ipse fecit vltima, qua defunctus est, ægitudine; Nam sibi iusserat psalmos Davidicos, qui sunt paucissimi de penitentia, scribi, ipsosque quaterniones, iacens in lecto contra parietem positos diebus suæ infirmitatis intuebatur, & legebat, & iugiter, ac vbertim flebat; Et ne intentio eius à quoquam impediretur, ante dies ferme decem, quam exiret de corpore, à nobis postulauit præsentibus, ne quis ad eum ingredere-

tur, nisi ijs tantum horis, quibus Medici ad inspiciendum intrarent, vel cum ei inferretur refectio; & ita obseruatum, ac factum est, & omni illo tempore, orationi vacabat, atque ita orans obdormiuit cum Patribus, mente sana, atque integris sensibus.

Non fuit dura, & aspera mors, quam poenitentiae lacrymae mollierant, cuius asperitatem omnem lacrymae caelestis patriae, ad quam sanctus ille peregrinus adspirabat, sua suauitate deterferant. Mors illi rheda fuit, qua in caelestem Beatorum regiam deueheretur: Sic enim ille solet bonorum mortem appellare vehiculum vitae beatæ, & immortalis.

Voluit non solum in vita, sed etiam post mortem latere, nullique esse cognitus illustrissimus Arsenius, iubens vt à morte mox pedibus fune alligato sursum in montem attraheretur. Cum tempus emigrationis adfuit, licuit illum videre, qui fuerat Angelis virtute par & similis, metu pulsari & opprimi, & ad lacrymas effundendas moueri: rogantibus ergo Discipulis, & tu, Pater, times mortem? Reuera, inquit, hic metus, quo me videtis affici, nunquam à me recessit ex quo factus sum Monachus. Hoc cum dixisset, & praesentibus Patribus, quam fieri potuit iucundissime, quæ in exitu dici solent, verba esset elocutus, Sanctorum Angelorum manibus verè beatam tradidit animam, cum vixisset inter Monachos quidem quinquaginta quinque annos, omnes autem, centum & viginti, nulla parte corporis vllò morbo mutilatus, sed id habens integrum, & propter continentiae labores firmum,

num, & suauissimum, promissa barba usque ad ventrem, gracilior ex abstinentia, & laboribus quibus se exercuit, procera statura corporis, senio paululum incuruatus; multis verò lacrymis effluerant pili superciliorum, quas ad lachrymas iugiter atque vbertim fluentes abstergendas, gremio suo pannum circumferre consueuerat. O præclarum alterum honoratę ac verè Christianę, Deo dignę senectutis, ac mortis exemplar! ô mortem eò magis expectandam, quod magis in omni superiore vita reformidata fuerat!

Si præter hanc vitam nihil superesset, atque vnà cum corpore simul animus interiret, fortè mors seni, non magnopere esset refugienda: nam rerum omnium satietas vitę quoque satietatem afferret. Sunt pueritię certa studia; num igitur ea desiderant adolēcentes? sunt & ineuntis adolēcentię; num ea iam constans requirit etas, quę media dicitur? sunt etiam huius ætatis; ne ea quidem quæruntur in senectute. Sunt autem extrema quędam studia senectutis; ergo ut superiorum etatum studia occidunt, sic occidunt, etiam senectutis; quod cum euenit, satietas vitę tempus maturum mortis affert. Omnia omnium etatum studia ad beatam æternitatem promerendam referenda sunt; cuius ubi certa spes affulget ex Diuina indulgentia, tunc maturum, & opportunū est mortis tempus; Quāquam omnino non esse, hoc ipsum viuētib; videri possit miserrimum, si penitus extinguērentur; Viuentibus, inquam, cum ratione, ac iudicio, qui suum nosse possunt,

sunt;

sunt, non præsens modò, verùm & præteritum, futurumve bonum, & malum: Verum enim vero, cum desideria ac studia senum non sic occidant, atque intereant; quin semper esse, & beati omnino esse velint, haud leue id est indicium immortalitatis animorum: Non enim id desiderium inane, ac frustra esse debet, quod omnibus senibus, atque adeo toti naturæ commune est.

Sed Catonem de animarum immortalitate differentem audiamus. Sic mihi persuasi, sic sentio, cum tanta celeritas sit animorum, tanta memoria præteritorum, futurorumque providentia, tot artes, tot scientiæ, tot inuenta, non posse eam naturam, quæ res eas continet, esse mortalem: cumque semper agitetur animus, nec principium motus habeat, quia se ipse moueat, ne finem quidem habiturum esse motus, quia nunquam se ipse sit relicturus: & cum simplex animi sit natura, neque habeat in se quidquam admixtum dispar sui atque dissimile, non posse eum diuidi; quod si non possit, non posse interire.

Quod ait Cato animum non habere principium motus, si intelligas, ne ipsius quidem creationis, ac naturæ, quasi nullum habeat existendi principium, & authorem; non est approbandum, cum sit ex nihilo conditus à Deo; quo sensu, & finem motus habere potest: Nam à Deo in nihilum redigi potest. Quod si intelligas, animum esse sui potentem, liberamque vim arbitrij obtinere, & in vtramque partem eligendi facultatem, inde sanè non obscure spiritualis eius, & immortalis natura colligi

colligi videtur, quâ re ad Angelum, & Deum proximè videtur accedere. Nisi spiritalis foret & immortalis, inferioris partis sensitivæ motibus, & appetitui vehementi vehementius ipse contra nitendo non posset obistere, cum secum ipse pugnat Animus, ac iracundiæ, luxuriæ, desidiæ, seu tristitiæ motus compescit; nec ab eo planè dependeat, sed pro naturæ suæ conditione superior atque eminentior existat; quod observatum est à S. Augustino, dum illud; *Lauda anima mea Dominum*, explicat: An fortè ipsa anima sibi dicit, & sibi quodammodo imperat, & se exhortatur, atque excitat? Quibusdam enim perturbationibus ex quadam sui parte fluitabat, ex qualiam. vero parte, quam vocant mentem rationalem, illam qua cogitat sapientiam, inhærens Domino iam & suspirans in illum anima, aduertit quasdam suas inferiores partes perturbari motibus sæcularibus, & cupiditate quadam terrenorum desideriorum ire in exteriora, relinquere interiorem Deum: reuocat se ab exterioribus ad interiora, ab inferioribus ad superiora, & dicit: *Lauda anima mea Dominum*.

Observat idem S. August. hoc arbitrij liberi dono, ac munere prælatum hominem cæteris animantibus, ut solus beatæ, ac miseræ vitæ capax existat, cui conveniat illud, psal. *Quia leuasti, elisisti me; alias: eleuans allisisti.* Vnde hoc? Homo in honore positus, factus est ad imaginem Dei, leuatus in hunc honorem, erectus à puluere, erectus à terra, accepit animam rationalem, præpositus est rationis
ipsum

in ps. 145.

psa. 101.
v. 11.

ipſius viuacitate omnibus beſtijs, pecoribus, volatilibus, piſcibus: Quid enim horum habet intelligentiæ rationem? Quia nullum horum factum eſt ad imaginem Dei. Quomodo nullum horum habet hunc honorem, ſic nullum horum habet hanc miſeriam: quod enim pecus plangit de peccato? quæ auis timet gehennam ignis æterni? quia nulla ei participatio beatæ vitæ, nulli ſtimuli miſeriarum. Homo autem, quia factus eſt, qui ſit in beata vita ſi bene vixerit, ideo erit in miſera vita, quia malè vixit. Ergo quia leuaſti, elidiſti me; ideo ſequitur me pœna, quia dediſti mihi liberum arbitrium.

Sanè ſi foret eadem hominum ac pecudum conditio, idem vitæ curſus atque exitus, idem corporum atque animorum interitus, præſtantior aliqua natura reperiretur in hoc Vniuerſo, cuius uſibus ac commodis ipſa quoque deſtinata foret, atque inſeruiret humana; ſed cum nulla ſit perfectior, ad eamque cætera omnia à Deo facta, quæ tota hac mole continentur vniuerſi, referantur; cum ſit Homo Princeps, ac Dominus huius terreſtris domicilij conſtitutus à Deo, viuæque eius effigies, cui cæteræ ſubdantur creaturæ, ſolusque Deum omnium Conditorẽ mente atque intelligentia conſequi poſſit, vt omnium vice Diuino eius Numini gratus exiſtat, obſequiumque deferat; haud eſt obſcurum Hominem animo, meliore ſui parte, ſpiritalem, immortalem, ac Deo ſimilem eſſe.

Sed proſequamur ex Catone. Apud Xenophontem moriens Cyrus maior hæc dicit:
Noli

Nolite arbitrari, o mihi charissimi filij, me cum à vobis discessero, nusquam, aut nullum fore: nec enim, dum eram, vobiscum, animum meum videbatis, sed eum esse in hoc corpore, ex ijs rebus, quas gerebam, intelligebatis. Eundem igitur esse creditote, etiam si nullum videbitis. Nec verò clarorum virorum post mortem honores permanerent, si nihil eorum ipsorum animi efficerent, quod diutius memoriam sui teneremus.

Sed non ea sola nobis inest cupiditas tuende apud posteros memoriæ; sed, ut iam dixi, vitæ ipsius sempiternæ atque immortalis; ipsius, inquam, eternitatis beatæ, insitâ, velut à naturâ propensione, cupidi sumus. At veteres illi, cum essent fidei luce destituti, ac per obscuros ex naturæ lumine suspicionibus ad veritatem deducerentur, neque tamen certâ cogitatione, ac persuasione futuram vitam, veramque ac beatam eternitatem complecterentur, illius umbram atque imaginem, apud posteros memoriam, tanto studio, ac contentione quæsierunt, tantos labores, diu noctuque, domi militiæque susceperunt ad inanem istam eternitatis umbram, posterorum memoriam, ex qua nihil illis planè accederet commodi, aut decederet incommodi; quod certè fuit inanissimum. Nam si dum adhuc inter homines viverent, parum, aut nihil illis conferre poterat nominis claritas, atque existimatio apud homines, qui multis erroribus obnoxij plerumque falluntur, & fallunt; quid defunctis adiumenti præstare potuisset.

Quid de me homines sentiant, aut sensuri
sint

sint post mortem, homines, inquam, vari,
 varij, & inconstantes, qui de rebus incomper-
 tis non secus ac de coloribus cæci, iudicant, id
 omnino parum, aut nihil me attingit, cum in-
 ternum bonum nullum adiciat, nullumque
 malum detrahat. Vnde & proverbio receptum
 est, honorem in honorante esse, non in hono-
 rato. Optimus cuique testis, sua est conscien-
 tia. Tum Deus Conditori nostro, & Beatis
 eius Angelis probare nos opere pretium est,
 & veram æternamque ab eis gloriam, ac lati-
 dem expectare. Posteritatis memoria, Musæ
 gloria, celebritasque nominis veteribus istis
 Romanis apud Inferos damnatis, quid omni-
 no prodest? sed vnam, ut dixi, consecra-
 bantur æternitatis, qui veram æternitatem
 ignorabant. Quod dixi iam, repeto: non est
 solum inest gloriæ studiosis cupiditas tuenda
 apud posteros memoria, sed omnibus pland
 velut quibusdam à natura notis indicata tem-
 perata beatæque vitæ. Nemo enim est, qui
 semper esse velit, quin omni modo velit esse
 beatissimus. Quod sanè desiderium inane esse
 non potest, neque frustra datum vniuersis ab
 ipso Authore naturæ. Nisi capaces essemus
 immortalitatis, non eius adeo, velut à natu-
 ra, cupidi esisteremus, non eius certa spe, &
 expectatione duceremur.

Maneat igitur animos nostros incorporeos
 esse, & immortales; etsi non sint æterni, nec
 à Diuina mente delibati, aut natura decerpti,
 in varia transmigrantes corpora, ut Platonici
 somniabant, tamen duraturos in æternum,
 neque cum corporibus interituros, quanquam
 singuli

tentiam; Si nunquam, bene, si aliquando, quare non modò? Laudabat & illam S. Ambrosij maximè memorabilem: Non sic vixi, vt me pudeat inter vos viuere, sed nec mori timeo, quia bonum Dominum habemus: Quod aiebat dixisse, necrederetur præfidens de suis purgatissimis moribus præsumpsisse. Innititur sanè purgata, pacataque conscientia, quæ secura mortem expectet, Dei imprimis infinitâ bonitate, clementiâ, ac misericordiâ; tum Christi Domini, Saluatoris meritis, ac pretio Redemptionis exhibito, cuius in partem venit vñ ac frequentatione piâ Sacramentorum, quæ sub extremum tempus crebriùs vsurpantur; tum denique vitæ honestè peractæ, cum ope Diuine gratiæ, memoriâ; expiatis ante commissis peccatis, ac primæ vâ innocentîâ restitutâ.

Hac conscientîâ, ac confidentiâ munitus Magnus Antonius mortem non exhorruit, sed expetiuit, & postremâ, quam ad suos habuit, concione prædixit: Cogit naturæ conditio, vt post centenarium numerum, quem annis quinque supergredior, iam resoluar. Et aliàs duobus, quos speciatim instituerat, discipulis; siue Amatham, & Macarium intelligas; siue Isaac, & Pelusianum: Ego, filioli, secundum eloquia scripturarum, Patrum gradior viam: Iam enim Dominus me inuitat, iam cupio videre cælestia. Sed vos, ô viscera mea, admoneo, ne tanti temporis laborem repente perdatis. Hodie vos religiosum institutum arripuisse arbitramini, & ceptæ voluntatis fortitudo succrescat. Ad finem, testamenti vice, vestimentorum meorum ista sit diuisio; Melotem, & pallium

ne quod speret quidem habet (habet omnino beatam æternitatem) At quoad hanc vitam, eò est meliore conditione quàm adulescens; nam id quod sperat ille, hic consequutus est. Ille vult diu vivere: hic vixit diu. Quamquam, ò Dij boni, quid est in hominis vitæ diu? Da enim supremum tempus: expectemus Tartessiorum Regis ætatem: fuit enim, ut scriptum video, Arganthonius quidam Gadibus, qui octoginta regnavit annos, centum viginti vixit. Sed mihi ne diuturnum quidem quidquam videtur, in quo est aliquid extremum: Cum enim id aduenit, tunc illud, quod præterijt, effluxit; tantum manet, quod virtute, & rectè factis consequutus sis. Horæ quidem cedunt, & dies, & menses, & anni, nec præteritum tempus reuertitur, nec quid sequatur sciri potest.

In eandem sententiam plenius S. Augustinus in illa verba psalmi trigesimali: *Accelera ut eruas me*. Ad hoc enim positum est (scilicet verbum *accelera*) ut hoc totum, quod nobis videtur quamdiu voluitur sæculum, intelligas punctum esse, Non est diu quod habet extremum. Ab Adam usque ad hodiernum diem, peractum est, & multò utriusque plus peractum est, quàm restat peragendum. Si adhuc viueret Adam, & hodie moreretur, quid ei prodesset tam diu esse, tamdiu vixisset? Ergo celeritas hæc quare? quia transuolant temporâ, & quod tibi tardum est, in oculis Dei breue est.

Cæterum, quod cuique temporis ad viuendum datur, eo debet esse contentus; Neque enim

enim histrioni, vt placeat, peragenda fabula est, modò, in quocumque fuerit actu, probe-
tur; neque sapienti vsque ad Plaudite venien-
dum: Breue enim tempus ætatis satis est lon-
gum ad bene honesteque viuendum; hoc est,
ad beatæ æternitatis fructum, vt ante dixi,
demetendum. Non refert quamdiu, sed quàm
bene vixeris; modò beatę portum æternitatis
teneas, non magnopere refert, an diu tempe-
state iacteris, an recto cursu, breuissimo pro-
ueharis in portum. Ex alterâ consequente
vitâ sempiternâ, summè aut beatâ aut misera,
quæ ad illam aditum patefacit, eiusque velut
exordium est, mors disiudicanda est, ac discer-
penda. Mors peccatorum pessima, quæ in
abyssum inferni, secundæ mortis, ac miseria-
rum omnium præcipitat. Mors Sanctorum
pretiosa, quæ cælestis æternitas comparatur,
quæ nos Dei, ac Beatorum conspectui sistit,
atque æternum adiungit eadem communi fæ-
licitate perfruituros.

Quis sit moriendi sensus, cum ad exiguum
tempus duret, præsertim seni iam exhausto,
sitne ea secundum naturam corporis animique
dissolutio, an aduersante ac repugnante natu-
râ? facillene fiat, an ægrè adhibita vi? an sicut
cum aquæ multitudine flammæ vis opprimi-
tur, sic moriantur iuuenes; senes autem sicut
sua sponte consumptus ignis extinguitur; aut
quali poma ex arboribus, si cruda sunt, vi
auelluntur; si matura, sponte decidunt: sic
vitam adolescentibus vis auferat, senibus matu-
ritas: nihil magnopere disquirendum existi-
mo. Sed viuendū finis est optimus, cum inte-

gramente, certisquesensibus, opus ipsa suum
eadem, quæ coagmentauit, natura dissoluit.
Vt enim nauem? Vt ædificium idem destruit
facillimè, quæ constituit; sic hominem eadem
optimè, quæ conglutinat, natura dissoluit.
Nam omnis conglutinatio recens, ægrè, in-
ueterata, facile diuellitur; ita fit, vt illud
breue vitæ reliquum temptis, nec auidè appe-
tendum sedibus, nec sine causâ deserendum
sitis. Vetatque Pythagoræ iniussu Impera-
toris, id est, Dei, de præsidio & statione
vitæ decedere.

Quid enim? malum est mori naufragio, &
bonum est mori febre? siue inde, siue inde
quis moriatur, quære qualis est, qui moritur;
quò post mortem iturus est, non vnde de vitâ
exiturus. Quocumque occasione hinc exituri
sumus. Vndecumque mors pro acciderit, bo-
na est. Nouit Deus, quid agat: Tu time, &
bonus esto. Vndecumque voluerit vt exas
hinc; paratum te inueniat. Inquilinus enim
es, non possessor domus: locata est enim tibi
domus, non donata; et si nolis, migrabis;
non tali conditione accepisti, vt quasi tempo-
ra certa tibi sint. Quid dixit Dominus Deus
tuus? Quando voluero, cum dixero: Migra,
paratus esto. Expello te de hospitio, sed dabo
domum. Inquilinus es in terra, eris possessor
in celo. Hec aptissimè S. August. Commo-
randi nobis natura diuersorium, non habitan-
di dedit. Tanquam ex hospitio, non tanquam
ex domo discedendum.

Meminisse oportet mortem primæui pec-
cati penam esse, & non ipsi Deo primo velut
authori

Ex Augu.
in ps. 148.

authori tribuendam. Cuiusmodi futurus sit
 sensus post mortem; & quæ mortem exce-
 ptura sit æternitas; id maxime laborandum;
 ac planè hoc meditatum ab adolescentia de-
 bet esse, mortem non ut negligamus, sed ma-
 ximâ curâ, ac piâ sollicitudine expectemus, ad
 quamque nos omni virtutum studio compa-
 remus, sine quâ meditatione ac præparatione,
 tranquillo esse animo nemo potest. Adorien-
 dum enim certè est; & incertum, an eo ipso
 die, mortem igitur omnibus horis impenden-
 tem timens, quis possit animo consistere? Is
 certè, qui in Dei timore, ac cultu sanctè vitam
 traduxerit, quem nullius grauioris criminis
 rea conscientia coarguerit, qui tamen non
 suis recte factis, sed Christi Domini meritis
 innitatur; qui morti ipsi cogitatione semper
 prodeat obuiam; ad eamque omni loco, ac
 tempore excipiendam Dei gratiâ sese præmi-
 nuerit, assiduâ cum virtutum Christianarum
 exercitatione, tum pia Sacramentorum vultu-
 ratione.

Merito illud Sancti Thomæ Aquinatis di-
 ctum laudatur; stultissimum hominem esse,
 qui se in statu peccati lethalis lecto, ac quieti
 committat; Nam ea ipsa fortè nocte contin-
 get eum emori, & ad Dei tribunal sisti: stul-
 tissimus sanè, qui vel momento, in eo statu
 velit esse, in quo nolit emori; qui mox illud
 commissum crimen, cum Dei gratiâ, quæ
 nunquam deest, elicitio contritionis actu,
 non expunxerit, & cum primum licuerit,
 Pœnitentiæ Sacramento, ac lacrymis non pla-
 nè diluerit.

Eccl. 7.
v. 12

Quis nisi stultissimus, in hoc æternæ mortis, ac damnationis discrimen conijcere se, in eoque, non dicam noctem, aut horam, sed punctum temporis hæreere velit? *Ne impiè agas multum: Qualis esse stultus, ne moriaris in tempore non tuo.* Sed in plerisque Christianis hodie vacillat fides, odiosaque omnis mortis, atque æternitatis memoria est. Nunquam ego mortem non timendam dixerim, quam sanctissimi quique viri non mediocriter reformidarunt. De Sancto Hilarione narrat Hieronymus; Cum modicus calor teperet in corpore, nec præter sensum quidquam viui hominis superesset, tamen apertis oculis loquebatur: Egredere, quid times, egredere anima mea, quid dubitas? septuaginta prope annis seruisti Christo, & mortem times? In quæ verba spiritum exhalauit. Si mortem timet Hilarion, quis senex non timeat?

Memorable est, quod de S. Augustino refert Possidius, cuius textum hic inferam. Dicere nobis inter familiaria colloquia consueuerat; Post perceptum baptismum, etiam laudatos Christianos Sacerdotes, absque dignâ, & competenti penitentiâ exire de corpore non debere. Quod ipse fecit vltima, qua defunctus est, ægritudine; Nam sibi iusserat psalmos Dauidicos, qui sunt paucissimi de penitentiâ, scribi, ipsosque quaterniones, iacens in lecto contra parietem positos diebus suæ infirmitatis intuebatur, & legebat, & iugiter, ac vbertim flebat; Et ne intentio eius à quoquam impediretur, ante dies ferme decem, quam exiret de corpore, à nobis postulauit præsentibus, ne quis ad eum ingredi-

tur, nisi ijs tantum horis, quibus Medici ad inspiciendum intrarent, vel cum ei inferretur refectio; & ita obseruatum, ac factum est, & omni illo tempore, orationi vacabat, atque ita orans obdormiuit cum Patribus, mente sana, atque integris sensibus.

Non fuit dura, & aspera mors, quam penitentiae lacrymae molliciant, cuius asperitatem omnem lacrymae caelestis patriae, ad quam sanctus ille peregrinus adspirabat, sua suauitate deterferant. Mors illi rheda fuit, qua in caelestem Beatorum regiam deueheretur: Sic enim ille solet bonorum mortem appellare vehiculum vitae beatæ, & immortalis.

Voluit non solum in vita, sed etiam post mortem latere, nullique esse cognitus illustrissimus Arsenius, iubens ut à morte mox pedibus fune alligato sursum in montem atraheretur. Cum tempus emigrationis adfuit, licuit illum videre, qui fuerat Angelis virtute par & similis, metu pulsari & opprimi, & ad lacrymas effundendas moueri: rogantibus ergo Discipulis, & tu, Pater, times mortem? Reuera, inquit, hic metus, quo me videtis affici, nunquam à me recessit ex quo factus sum Monachus. Hoc cum dixisset, & praesentibus Patribus, quam fieri potuit iucundissime, quæ in exitu dici solent, verba esset elocutus, Sanctorum Angelorum manibus verè beatam tradidit animam, cum vixisset inter Monachos quidem quinquaginta quinque annos, omnes autem, centum & viginti, nulla parte corporis vllò morbo mutilatus, sed id habens integrum, & propter continentiae labores fir-

num, & suauissimum, promissa barba vsque ad ventrem, gracilior ex abstinence, & laboribus quibus se exercuit, procera statura corporis; senio paululum incuruatus; multis verò lacrymis effluerant pili superciliorum, quas ad lachrymas jugiter atque vbertim fluentes abstergendas, gremio suo pannum circumferre consueuerat. O præclarum alterum honoratę ac verè Christianę, Deo dignę senectutis, ac mortis exemplar! ô mortem eò magis expetendam, quò magis in omni superiore vita reformidata fuerat!

Si præter hanc vitam nihil superesset, atque vnà cum corpore simul animus interiret, fortè mors seni, non magnopere esset refugienda: nam rerum omnium satietas vitę quoque satietatem afferret. Sunt pueritię certa studia; num igitur ea desiderant adolescentes? sunt & ineuntis adolescentię; num ea iam constans requirit etas, quę media dicitur? sunt etiam huius ætatis; ne ea quidem quæruntur in senectute. Sunt autem extrema quędam studia senectutis; ergo vt superiorum etatum studia occidunt, sic occidunt, etiam senectutis; quod cum euenit, satietas vitę tempus maturum mortis affert. Omnia omnium etatum studia ad beatam æternitatem promerendam referenda sunt; cuius vbi certa spes affulget ex Diuina indulgentia, tunc maturum, & opportunum est mortis tempus; Quāquam omnino non esse, hoc ipsum viuētib; videri possit miserrimum, si penitus extinguerentur; Viuentibus, inquam, cum ratione, ac iudicio, qui suum nosse possunt,

sunt, non præsens modò, verùm & præteritum, futurumve bonum, & malum; Verum enim vero, cum desideria ac studia senum non sic occidant, atque intereant; quin semper esse, & beati omnino esse velint, haud leue id est indicium immortalitatis animorum: Non enim id desiderium inane, ac frustra esse debet, quod omnibus senibus, atque adeo toti naturæ commune est.

Sed Catonem de animarum immortalitate differentem audiamus. Sic mihi persuasi, sic sentio, cum tanta celeritas sit animorum, tanta memoria præteritorum, futurorumque providentia, tot artes, tot scientiæ, tot inuenta, non posse eam naturam, quæ res eas continet, esse mortalem: cumque semper agitur animus, nec principium motus habeat, quia se ipse moueat, ne finem quidem habiturum esse motus, quia nunquam se ipse sit reliquurus: & cum simplex animi sit natura, neque habeat in se quidquam admixtum dispar sui atque dissimile, non posse eum diuidi; quod si non possit, non posse interire.

Quod ait Cato animum non habere principium motus, si intelligas, ne ipsius quidem creationis, ac naturæ, quasi nullum habeat existendi principium, & authorem; non est approbandum, cum sit ex nihilo conditus à Deo; quo sensu, & finem motus habere potest: Nam à Deo in nihilum redigi potest. Quod si intelligas, animum esse sui potentem, liberamque vim arbitrij obtinere, & in vtramque partem eligendi facultatem, inde sanè non obscure spiritualis eius, & immortalis natura colligi

colligi videtur, quâ re ad Angelum, & Deum proxime videtur accedere. Nisi spiritalis foret & immortalis, inferioris partis sensitivæ motibus, & appetitui vehementi vehementius ipse contra nitendo non posset obistere, cum secum ipse pugnat Animus, ac iracundiæ, luxuriæ, desidiæ, seu tristitiæ motus compescit; nec ab eo plane dependeat, sed pro naturæ suæ conditione superior atque eminentior existat; quod observatum est à S. Augustino, dum illud; *Lauda anima mea Dominum*, explicat: An fortè ipsa anima sibi dicit, & sibi quodammodo imperat, & se exhortatur, atque excitat? Quibusdam enim perturbationibus ex quadam sui parte fluitabat, ex quadam verò parte, quam vocant mentem rationalem, illam qua cogitat sapientiam, inhærens Domino iam & suspirans in illum anima, aduertit quasdam suas inferiores partes perturbari motibus sæcularibus, & cupiditate quadam terrenorum desideriorum ire in exteriora, relinquere interiorem Deum: reuocat se ab exterioribus ad interiora, ab inferioribus ad superiora, & dicit: *Lauda anima mea Dominum*.

Observat idem S. August. hoc arbitrij liberi dono, ac munere prælatum hominem cæteris animantibus, ut solus beatæ, ac miseræ vitæ capax existat, cui conveniat illud, psal. Quia leuasti, elisisti me; alias: eleuans allisisti. Vnde hoc? Homo in honore positus, factus est ad imaginem Dei, leuatus in hunc honorem, erectus à pulvere, erectus à terra, accepit animam rationalem, præpositus est rationis ipsius

in ps. 145.

ps. 101.
v. 11.

ipsius viuacitate omnibus bestijs, pecoribus, volatilibus, piscibus: Quid enim horum habet intelligentiæ rationem? Quia nullum horum factum est ad imaginem Dei. Quomodo nullum horum habet hunc honorem, sic nullum horum habet hanc miseriam: quod enim pecus plangit de peccato? quæ auis timet gehennam ignis æterni? quia nulla ei participatio beatæ vitæ, nulli stimuli miseriarum. Homo autem, quia factus est, qui sit in beata vita si bene vixerit, ideo erit in misera vita, quia malè vixit. Ergo quia leuasti, elisisti me; ideo sequitur me pœna, quia dedisti mihi liberum arbitrium.

Sanè si foret eadem hominum ac pecudum conditio, idem vitæ cursus atque exitus, idem corporum atque animorum interitus, præstantior aliqua natura reperiretur in hoc Vniuerso, cuius vñibus ac commodis ipsa quoque destinata foret, atque inseruiret humana; sed cum nulla sit perfectior, ad eamque cætera omnia à Deo facta, quæ tota hac mole continentur vniuersi, referantur; cum sit Homo Princeps, ac Dominus huius terrestriis domicilij constitutus à Deo, viuæque eius effigies, cui cæteræ subdantur creaturæ, solusque Deum omnium Conditor mentis atque intelligentia consequi possit, vt omnium vice Diuino eius Numini gratus existat, obsequiumque deferat; haud est obscurum Hominem animo, meliore sui parte, spiritalem, immortalem, ac Deo similem esse.

Sed prosequamur ex Cætone. Apud Xenophontem moriens Cyrus maior hæc dicit:
Nolite

Nolite arbitrari, o mihi charissimi filij, me cum à vobis discessero, nusquam, aut nullum fore: nec enim, dum eram vobiscum, animum meum videbatis, sed eum esse in hoc corpore, ex ijs rebus, quas gerebam, intelligebatis. Eundem igitur esse creditote, etiam si nullum videbitis. Nec verò clarorum virorum post mortem honores permanerent, si nihil eorum ipsorum animi efficerent, quod diutius memoriam sui teneremus.

Sed non ea sola nobis inest cupiditas tuende apud posteros memoriæ; sed, ut iam dixi, vitæ ipsius sempiternæ atque immortalis; ipsius, inquam, eternitatis beatæ, insitâ velut à naturâ propensione; cupidi sumus. At veteres illi, cum essent fidei luce destituti, ac per obscuris ex naturæ lumine suspicionibus ad veritatem deducerentur, neque tamen certâ cogitatione, ac persuasione futuram vitam, veramque ac beatam eternitatem complecterentur, illius vmbra atque imaginem, apud posteros memoriam, tanto studio, ac contentione quæsierunt, tantos labores, diu nocturque, domi militæque susceperunt ad inanem istam eternitatis vmbra, posterorum memoriam, ex qua nihil illis planè accederet commodi, aut decederet incommodi; quod certè fuit inanissimum. Nam si dum adhuc inter homines viverent, parum, aut nihil illis conferre poterat nominis claritas, atque existimatio apud homines, qui multis erroribus obnoxij, plerumque falluntur, & fallunt; quid defunctis adiuvanti præstare potuisset.

Quid de me homines sentiant, aut sensuri
sunt

sint post mortem, homines, inquam, vani, varij, & inconstantes, qui de rebus incomper-
tis non secus ac de coloribus cæci, iudicant, id
omnino parum, aut nihil me attingit, cum in-
ternum bonum nullum adiciat, nullumque
malum detrahatur. Vnde & proverbio receptum
est: honorem in honorante esse, non in hono-
rato. Optimus cuique testis, sua est conscien-
tia: Tum Deus Conditor nostro, & Beatis
eius Angelis probare nobis opus pretium est,
& veram æternamque ab eis gloriam, ac lau-
dem expectare. Posteritatis memoria, laus &
gloria, celebrataque nominis veteribus istis
Romanis apud Inferos damnatis, quid omni-
no prodest? sed umbram, uti dixi, consecta-
bantur æternitatis, qui veram æternitatem
ignorabant. Quod dixi iam, repeto: non est
solum inest gloriæ studiosis cupiditas tuenda
apud posteros memoria; sed omnibus pland
velut quibusdam à natura notis indita sem-
per beatæque vite. Nemo enim est, qui
semper esse velit, quin omni modo velit esse
beatissimus. Quod sanè desiderium inane esse
non potest, neque frustra datum vniuersis ab
ipso Authore naturæ. Nisi capaces essemus
immortalitatis, non eius adeo, velut à natu-
ræ cupidi esisteremus, non tibi certa spe, &
expectatione duceremur.

Maneat igitur animos nostros incorporeos
esse; & immortales; etsi non sint æterni, nec
à Diuina mente delibati, aut natura decerpti,
in varia transmigrantes corporea, uti Platonic
somniabant, tamen duraturos in æternum,
neque cum corporibus interituros; quanquam
singuli

linguli creentur ex tempore de nihilo, quoties corporum, quibus infunduntur, in vteris maternis formatio, generisque nostri propagatio requirit; incorporei sunt, & immortales, Angelicis prope spiritibus natura pares, qui demum, cum è corporibus excesserint in Divina gratia, absque vlla sceleris contagione, beatam illam vitam vivunt, quæ sola vita nominanda est: nam dum sunt in his inclusi compagibus corporis, munere quodam necessitatis, & gravi onere perfunguntur, ac quodammodo futuræ se illi alteri vitæ parant, atque approbant immortalis.

Neque verò Deus Hominem condidit, ut huius tantummodo mortalis vitæ commodis perfrueretur, de quibus quidem in beato illi primæ iustitiæ statu cumulatè providerat, sed neque lapsum hominem reparavit Deus per adventum Filij sui Salvatoris, in terras, ut hanc dumtaxat vitam experti gravius criminis, in gratia ac benedolentia Conditoris sui perageret: non erat tanti præsens hæc vita, tam exiguo spatio, ac curriculo, definita, ut Deus hominem conderet, & tanto impendio Sanguinis Filij sui repararet: non bene essent collocata Creationis, ac Redemptionis, Naturæ ac Gratiæ Divina beneficia, si non vitæ mortalem hanc vitam longius protogarentur; cumque nec in hac vita probis, ac pijs semper rectè factorum merces rependatur, nec scelerati, & impij pœnas luant malefactorum, id in altera demum vita sempiterna præstari postulat æquissima Iustitiæ Divinæ lex, ac ratio. Caruissent omnino fructu suo Legis

Euange-

Euangelicæ myſteria, ac Sacramenta, ſi non ad alteram æternam, beatamque vitam pertinuiffent.

Quare non ſemel S. Auguſtinus negat nos ob hanc dumtaxat vitam eſſe Chriſtianos, cum tota ſpes Chriſtiana in alteram ſe maximè protendat vitam. Negarim & ego nos homines eſſe, iudicijque, ac rationis munere donatos à Deo, ſi non ad alteram capeſcendam vitam adſpiraremus. Quomodo & ipſe Gentilis Seneca diſſerit: Vt nouem menſibus nos tenet maternus vterus, & præparat non ſibi, ſed illi loco, in quem videmur emitti iam idonei ſpiritum trahere, & in aperto durare; ſic per hoc ſpatium, quod ab infantia patet in ſenectutem, in alium naturæ ſumimur partum.

*l. de beatâ
vita.*

Qua etiam de cauſa in Eccleſiæ quoque ſiſtis dies, quo ex hac mortali vita in alteram immortalem quiſque Sanctus emigrarit, Natalis eius appellatur. Cum igitur pleniffimè de altera vita fide ſumus inſtructi; Quod ſit Beatorum domicilium, Empyreum cælum; quæ ſocietas Angelorum; quæ gloria, voluptas, opulencia, dignitas; quæ beatitudo, ſtatus omnium bonorum aggregatione perfectus; quæ clara Dei viſio: quis ſummus amor perpetuus ſumma contentione elicitus: quo perfruemur vltimo fine noſtro, ſummo bono; quæ corporum reſurrectio glorioſa, ſupremum iudicij diem conſequutura nos expectet, ac maneat, ſi puri ac caſti ab omni ſcleris contagione ex hac vita migrauerimus, ſi, quam ſacro fonte Baptiſmatis accepimus ſtolam innocentie

tentiam; Si nunquam, bene, si aliquando, quare non modò? Laudabat & illam S. Ambrosij maximè memorabilem: Non sic vixi, vt me pudeat inter vos viuere, sed nec mori timeo, quia bonum Dominum habemus: Quod aiebat dixisse, necrederetur præfident de suis purgatissimis moribus præsumpsisse. Innititur sanè purgata, pacataque conscientia, quæ secunda mortem expectet, Dei imprimis infinita bonitate, clementiâ, ac misericordiâ; tum Christi Domini, Saluatoris meritis, ac pretio Redemptionis exhibito, cuius in partem venit visu ac frequentatione piâ Sacramentorum, quæ sub extremum tempus crebrius vsurpantur; tum denique vitæ honestè peractæ, cum ope Diuine gratiæ, memoriâ; expiatis ante commissis peccatis, ac primæ vâ innocentiam restitutâ.

Hac conscientiam, ac confidentiam munitus Magnus Antonius mortem non exhorruit, sed expetiuit, & postremam, quam ad suos habuit, concione prædixit: Cogit naturæ conditio, vt post centenarium numerum, quem annis quinque supergredior, iam resoluar. Et aliàs duobus, quos speciatim instituerat, discipulis; siue Amatham, & Macarium intelligas; siue Isaac, & Pelusianum: Ego, filioli, secundum eloquia scripturarum, Patrum gradior viam: Iam enim Dominus me inuitat, iam cupio videre cælestia. Sed vos, ô viscera mea, admoneo, ne tanti temporis laborem repente perdatis. Hodie vos religiosum institutum arripuisse arbitramini, & ceptæ voluntatis fortitudo succrescat. Ad finem, testamenti vice, vestimentorum meorum ista sit diuisio; Melotem, & pallium

G

tritum

tritum Athanasio Episcopo date, quod mihi nouum ipse detulerat; Serapion Episcopus aliam accipiat melotem; vos cilicinum habetote vestimentum, & valete viscera mea: Antonius enim migrat, & iam non erit in præsenti sæculo vobiscum. Verba finierat, & osculanti-
bus se discipulis, extendens paululum pedes mortem lætus aspexit; ita, vt ex hilaritate vultus eius, Angelorum Sanctorum, qui ad perfectam animam eius descenderant, præsentia nosceretur. O fortunatam mortem! o præstantem morti præuiam senectutem.

Neque verò minus illustris fuit tum mors, tum senectus, etsi non adeo prouecta, S. Martini Turonensis Episcopi: Obijt enim dum in visitatione suæ Diœcesis, veluti stans ac pugnas Imperator, versaretur. Cum plangerent circumstantes discipuli, quibus sui corporis dissolutionem imminere prædixerat, ac flentes ingeminarent: Cur nos, Pater, deseris? cui nos desolatos relinquis? Vt totus semper in Domino misericordiæ visceribus affluebat, lacrymas quoque non tenuit, & ad Deum conuersus: Domine, si adhuc populo tuo sum necessarius, non recusò laborem, fiat voluntas tua. O virum ineffabilem, nec labore victum, nec morte vincendum, qui nec mori timuit, nec viuere recusauit in decrepitâ, atque exhaustâ senectute! Quamuis optata seni sit sessio post laborem, est tamen animus victor annorum, & cedere nescius senectuti.

Cum iam per aliquot dies vi februm teneretur, non tamen à Dei opere cessabat, per noctes in orationibus & vigilijs, fatiscentes artus spiritu

ritu seruire cogebat, nobili illo strato suo in cinere & cilicio recubans; Et cum à discipulis rogaretur, vt saltem fineret vilia sibi stramenta supponi; Non decet, inquit, filij, Christianum, nisi in cinere mori. Ego si aliud exemplum vobis relinquo, ipse peccaui. Oculis, ac manibus in cælum semper intentus, inuictum ab oratione spiritum non relaxabat. Et cum à Presbyteris, qui tum ad eum confluxerant, rogaretur, vt corpusculum lateris mutatione releuaret; finite, inquit; finite me, fratres, Cælum potius respicere, quàm terram, vt suo iam itinere iturus ad Dominum spiritus dirigatur. Hæc locutus diabolum vidit prope assidere: Quid hæc, inquit, adstas cruenta bestia? nihil in me, funeste, reperies, Abrahæ me sinus excipiet. Cum hac ergo voce fatigatum Diuinis operibus spiritum Cælo reddidit, testatque nobis sunt, qui adfuerunt, iam exanimi corpore, glorificati hominis gloriam se vidisse, de quâ sanè non erat ambigendum. Sed vteris tu quidem, ô gloriose Pontifex, Scripturæ phrasi: Abrahæ me sinus excipiet; cum dicere oportuisset (nisi tua te forsan humilitas inhibuisset) Iesu Christi me sinus excipiet. Planè fidelis es, ac prudens seruus, qui re bene gestâ audisti ab eo: Intra in gaudium Domini tui.

O si, cum in exitu nostro cæcodæmon, hostis noster, se offerret, illi queam exprobrare: Nihil in me, funeste, reperies! Si nullius criminis rea conscientia, confidens in Christi Domini gratia, ac meritis, eius aduentum securè expectet, illique etiam prodire gestiât obuiam, accensa lampade charitatis. *Illumina Deus oculos*

ps. 12. v. 5.
v. 6.

meos ne unquam obdormiam in morte: ne quando dicat inimicus meus: Praualui aduersus eum. Qui tribulant me, exultabunt si motus fuero; qui tum maximè infidiabuntur, vimque & dolos omnes admouebunt, hostes animæ infensissimi. Ego autem in misericordia tua speravi, & ad extremum usque spiritum sperabo. Exultabit cor meum in salutari tuo: cantabo Domino qui bona tribuit mihi: & psallam nomini Domini altissimi, corde, ore, manuque Deum benedicam adiutorem, ac susceptorem in extremo spiritu.

Nam tametsi dispar sit admodum, & prope modum infinito spatio dissita vita mea ab innocentia, ac sanctitate S. Martini: quam uiseam mortem confidentiæ in Deum, & ardentissimæ charitatis, omniumque virtutum notis illustrissimam, sperare non audeam; tamen in Dei bonitate, ac misericordia, in Christi Domini meritis, Sanctissimæque Passionis eius, ac mortis memoria confisus, Sanctissimæ eius Matris Sanctorumque Patronorum meorum precibus adiutus mortem obire non dubitem: si præsertim Ecclesiæ me Sacramentis, Pænitentia, & Eucharistia, quæ eadem & pignus, & viaticum est æternæ vitæ, Oleo quæ Sacro infirmorum communiri voluerit: si ad priora beneficia gratiæ hoc quoque postremum adiunxerit, non dubitanter, nec trepidè mortem excipiam.

Quidni Christianus senex, bonæ spei plenus, ac lætitiæ, quam illi Christi Domini merita Passionis & mortis, tum eius ope rectè acta vita superior, atque usurpata Sacramenta conciliant, mortem non tam exhorreat, quam vehemen-

vehementer expetat, animoque læto, ac gratanti excipiat, in Christum ducem iuvenem intuens morientem, ac resurgentem, ipsâ morte, ac resurrectione commonstrantem, quæ sit ineunda via vitæ, & quis huius mortalis viæ futurus sit exitus ac terminus optatissimus, vita immortalis? Per mortem ad resurrectionem aditur vitæ immortalis, ac gloriosæ; ad Cæleste Regnum, Beatorum societatem, ad quam quis non votis omnibus adspiret?

Reuocet in memoriam quot iam ex æqualibus suis eadem vitæ societate sibi coniunctis, quibuscum vixerat concordissimè, Deumque sanctè coluerat, ad illum omnium scopum, eiusque Cæleste Regnum obitâ morte sint antegressi: à quibus ad Deum perfruendum, ineundumque Cæleste Regnum amicissimè provocetur. Meminerit & Sanctorum suorum Tutelarium, quos in omni vita serio religionis cultu est prosequutus, à quibus ad æternam vitam, Cælestemque Patriam, deserta tandem aliquando terra, benignissimè inuitetur; Et dicat ex psalmo: *Lætatus sum in his, quæ dicta sunt mihi: in domum Domini ibimus.* In quem psalmum eleganter, atque appositè S. Augustinus. Fratres, veniat in mentem Charitati vestræ, si qua fortè festiuitas Martyrum, & locus aliquis sanctus nominatur, quò certo die turbæ confluunt ad celebrandam solennitatem, illæ turbæ quomodo se exsuscitant? quomodo se hortantur, & dicunt: Eamus, eamus; & quærunt: Quò eamus? & dicitur: ad illum locum, ad sanctum locum. Inuicem sibi loquuntur, & tanquam incensi sigillatim faciunt vnâ flam-

Ps. 122.
v. 1.

mam, & ipsa vna flamma facta ex colloquutione sese accendentium, rapit illos ad locum sanctum, & cogitatio sancta sanctificat eos. Si ergo ad locum temporalem sic rapit amor sanctus, qualis amor debet esse, qui concordēs rapit in Cælum, & dicentes sibi: In domum Domini ibimus. Ergo curramus, curramus, quia in domum Domini ibimus. Curramus, & non fatigemur, quia illuc perueniemus, vbi non lassabimur. Curramus in domum Domini: iucundetur anima nostra in his, qui ea nobis dicunt: qui enim ea nobis dicunt, priores viderunt ipsam patriam de longinquo clamantes ad posteriores: In domum Domini ibimus.

Viderunt illam Apostoli, & dixerunt nobis: Currite, ambulate. Viderunt illam Sancti Martyres, Sancti Confessores, Religiosorum Ordinum Fundatores, Patroni nostri, qui nos suo cætui Beatorum cupiunt aggregare. Viderunt æquales nostri nuper ex hac vita digressi, quibus recens parentauimus, qui nos bene sperare iubent, non proprijs innixos virtutum meritis, atque officijs; Sed Christi Domini gratia, & beneficentia: merito Sacrosanctæ Passionis eius, ac mortis, qua nobis sempiternæ vitæ Regnum est patefactum. Hic Auctor est fidei, ac spei nostræ; Hic nos bene, atque optimè sperare iubet, qui sua morte vitam peperit æternam, qui moriens mortem interemit, ac resurgens æternitatis aditum, deuicta morte, reserauit.

Beati, qui habitant in domo tua Domine: in secula seculorum laudabunt te. O beati, putamus erimus nos sic? Eia suspiremus, de suspirio gemamus. Et quid sumus, vt ibi simus? mortales, proiecti,

proiecti, abiecti, terra, & cinis. Sed qui promissit omnipotens est. Non est facturus Angelum ex homine, qui fecit hominem ex nihilo? Aut verò pro minimo habet Deus hominem, propter quem mori voluit vnicum suum? Tales arrhas accepimus, tenemus mortem Christi, tenemus Sanguinem Christi. Qui donauit impijs mortem suam, quid seruat iustis nisi vitam suam? Plura in eandem sententiam tum ibi, tum alibi idem S. August, Plus est iam quod fecit, quàm quod promissit. Quid fecit? Mortuus est pro te, Quid promissit? vt viuas cum illo. Incredibilius est, quod mortuus est æternus, quàm vt in æternum viuat mortalis. Si propter hominem mortuus est Deus, non est victurus homo cum Deo? Hæc planè anchora est fidei, ac spei nostræ, mors Redemptoris nostri, qua sempiternam nobis vitam comparauit: hac enim morte Filij Dei contusus est aculeus mortis, ac præfractus est stimulus peccati, quo corpus, animamque conficiebat, *Absorpta est mors in victoria, Vbi est mors victoria tua? ubi est mors stimulus tuus? stimulus autem mortis peccatum est: virtus verò peccati lex. Deo autem gratias, qui dedit nobis victoriam per Dominum nostrum Iesum Christum.* 1. Cor. 15.

Commendet sanè, qui volet senectutem ab usu rerum, & experientia, ab auctoritate, quam ille ait apicem senectutis, à prudentia, pace, & tranquillitate, quam affert, compositis animi motibus, qui solent in priore ætate turbulentiores existere; præcipuam ego senectutis laudem duxerim, quod morti sit propinquissima, non modò quod eam prope iam adesse prænun-

tiet, qua nulla potest esse salutarior admonitio (qua de causa dici quoque potest senectus, non secus ac Philosophia, Mortis commentatio) verum maximè, quod minimo à morte spatio disiuncta, quod proximus ad mortem sit aditus proximaque dispositio, adeoque eius quædam inchoatio. Ac quemadmodum nunquam satis dignè laudari potest mors proba, ac pia, quæ in charitate, & Dei gratia suscipitur, quæ summum illud perseverantiæ donum habet annexum, mors planè pretiosa, extrema gratia pretij infiniti cumulata, qua cælum emittitur, ac vita beata; ad eundem modum proba, piaque senectus, meritis laudibus nunquam satis efferripotest, quæ proximo gradu mortem præcedit, estque eius velut aliqua pars, illi connexa, illam secum aduchens, atque vnà secum magnum illud perseverantiæ donum, pretio incomprehensum.

Venit mihi in mentem eius tribulationis, non quæ multiplex sæpe nos incautos inuenit, & repugnantes opprimit; sed quam nos debemus, ait S. Augustinus, quærere, & inuenire; de qua est in psalmo: *Tribulationem, & dolorem inueni: & nomen Domini inuocaui. Inuoca me in die tribulationis.* Quæ est ista? Ea ipsa, in hoc mundo felicità, affluentia rerum temporalium, non quidem ipsa tribulatio est, sed solatia sunt tribulationis. Cuius tribulationis? Nostre peregrinationis. Hoc enim ipsum quod cum Deo nondum sumus, hoc ipsum quod inter tentationes molestiasque versamur, quod sine timore esse non possumus, tribulatio est: non enim est illa securitas, quæ nobis promissa est

in ps. 49.

Ps. 114.
Ps. 49.

est. Hanc tribulationem suæ peregrinationis qui non inuenerit, ad patriam redire non cogitat. Et cætera, quæ prosequitur S. Augustinus; dum miserorum miseria facit nos compatiētes, atque cum eis miseros.

Hoc igitur quanti est, quod senectus, & mors consequens, huic tribulationi finem optatum imponit? quod extra miseriam omnem, tum nostram, tum proximi, tandem aliquando nos abducit, ac securos in æterna fælicitate, ac Dei laude, gratiarumque actione constituit? Inter miseras illa sanè præcipua est, peccatorum, si non quidem grauiorum, at crebriorum ex innata corruptione carnis, concupiscentiæ fomite, ac vitæ huius fragilitate necessitas quædam velut imposita, quæ senectute minuitur, & morte prorsus extinguitur. Tum & anceps illud, reformidandumque discrimen damnationis, & secundæ mortis incurrendæ, quo nisi morte liberari non possumus, auferetur. Est igitur præcipua laus, ac commendatio senectutis appropinquatio mortis.

Alexis quispiam Poëta, cum quicum senio fessum, ægre ac lentè videret incedere, rogaret, 'quid ageret: Paulatim, inquit, morior; significans senes non viuere, sed lentè mori. Quod egregiè Gregorius. Quid enim est quotidianus defectus corruptionis, qui maximè viget in senectute, quam quædam prolixitas mortis? in dies se mori, ac deficere senex experimento condiscit, & quot diebus, & horis, tot se passibus acceleratis ad metam vltimam propinquare sentit. Senex semper est in periculo mortis, vti respondet Iuriconsultus,
non

non remoto, sed proximo, in limine ipso, atque aditu mortis, omnibusque eam prope momentis expectare debet; & si rite est comparatus, pacatâ conscientiâ, expeditis vitæ suæ rationibus, expetere,

tract. 9. in
ep. Ioan.

Sunt homines, inquit Augustinus, qui cum patientiâ viuunt. Qui adhuc desiderat istam vitam, patienter tolerat mortem, luctatur aduersum se, vt sequatur voluntatem Dei, ex desiderio præsentis vitæ fit lucta cum morte, adhibet patientiam, & fortitudinem, vt æquo animo moriatur; Qui autem desiderat, sicut dicit Apostolus, dissolui, & esse cum Christo, non patienter moritur, sed patienter viuunt, & delectabiliter moritur. Ex quo numero est probatus senex, qui Sancti Simeonis instar, Christum Fide, Spe, Charitate complexus, Diuino in eo complexu cupit emori, sæpe illud cygneum carmen animo, & ore voluens:

Philip. 1.

Luc. 2.
7. 29. 30.

Nunc dimittis seruum tuum Domine, secundum Verbum tuum in pace: Quia viderunt oculi mei salutare tuum.

Dux sunt, si quæ aliæ, præstantes notæ salutis, electionis, ac prædestinationis nostræ; contemptus rerum terrenarum, & ardens desiderium cælestium; si præsens hæc vita fastidio sit, futura in voto, ac desiderio. Ad eam vitam maximè pertinemus, quæ nobis maximè curæ est, ac cordi. Affectu iam sumus, quod re futurisumus. Interroget se quisque quid amet, ait S. Augustinus, & inueniet vnde sit ciuis, terrestrisne Babylonis, an supremæ cælestis Ierusalem? At verò hunc vtrumque pietatis affectum conferre, atque ingenerare videtur senectus,

senectus, dum longo rerum usu atque experientia docuit, quàm fluxa, quàm caduca, quàm inania, & flocci facienda terrena omnia, quæ vulgò magna censentur bona; dumque propius Cælum intuens, cælestia ac spiritalia bona certiore spe, atque expectatione complectitur, ad eaque suspirans ac gemens anhelat; dum velut è longâ nauigatione, ac tempestate periculosa, terram ac portum adspicit, in quem proximo cursu sæliciter inuehatur.

Quin verò dum summam Deo vacandi præbet opportunitatem senectus; hinc quidem compressis animi perturbationibus, tranquillitatem, ac pacem afferens; inde à rebus gerendis, omniq; curâ rei tum publicæ, tum priuatæ seuocans, otiumque sanctum indulgens, cælestis vitæ Beatorum existimari potest quædam velut prælibatio ac degustatio, ad eius certè similitudinem, quàm proximè accedens inchoata quædam, & imperfecta beatitudo. Quas S. Bernardus Religiosi status præeminentias, ac singularia commoda breuiter explicat, ea mihi in Christianam quoque senectutem aptè conuenire videntur. Dicam igitur eius verbis: In senectute viuit homo purius, cadit rarius, surgit velocius, incedit cautiùs, irroratur frequentiùs, moritur confidentiùs, purgatur citiùs, remuneratur copiosiùs, quod planè necesse est, si priores ætates, ac senectus in Diuino obsequio traducta maiores gratiæ cumulos aggregarit: Nam gratiæ gloria respondet, laborique merces æqua proportionē rependitur.

Denique cæteris ætatibus præferenda est
senē.

senectus, quod in ea iam extincta, aut valde diminuta cupiditate, charitas magis efferuescit, atque efflorescit. Vt patiendi, sic & merendi copiosior quædam seges in senectute videtur offerri, qua Dei, proximique charitas magis augeatur, atque inflammetur. Neque tantum bene merendi de proximo, pro eo, quod exiguum superest, vitæ tempore vehementi ardet desiderio; sed Christi Domini Saluatoris, Sanctissimæ eius Virginis Matris, ac totius Curie Cælestis tandem aliquando coram intuendæ, adorandæ ac perfruendæ zelo flagrat incensissimo. Quid dicam de ipsius Deitatis, ac totius Sanctissimæ Trinitatis aspectu beatifico? de summi boni, ac finis vltimi beata perfruitione? Quam illam pius senex ardentius sitit! quot votis, suspirijs, lacrymis, quotidie inclamat! quam illi spes omnis, ac mora longa videtur, tarda quæ expectatio!

O præclarum illum diem, quo nos ad Christi Domini Saluatoris pedes abijcere licebit, & sacra illa vulnerum nostræ Redemptionis notis insignita complecti vestigia! quo ad Beatæ quoque Matris genua, non iam, ut consueveramus, supplices; sed gratulabundi prouoluemur, de tot tantisque per eam à Filio beneficijs acceptis gratulantes, ac gratias agentes sempiternas! Quando in cæleste domicilium, ac concilium Beatorum, tot Eminentium Apostolorum, & Apostolicorum virorum, Illustrissimorum Martyrum, Pontificum, Doctorum, ac Confessorum, Sanctissimarumque Virginum, inter Choros Angelorum, Beatarum mentium infinita quadam
corona

corona circumsepti, recipiemur, ea sempiternum felicissima societate perfruituri? Licebit Apostolorum Principes Petrum ac Paulum, Andream, Ioannem; Martyrum Duces Stephanum, Laurentium; eminentissimosque Heroas, Augustinum, Hieronymum, Benedictum, Bernardum, Franciscum, Dominicum, Ignatium coram alloqui, & complecti, & ab eorum beato latere, ne latum quidem vnguem abscedere.

Quid de beatifico Deitatis, ac totius Sanctissimæ Trinitatis aspectu cogitare nos par est? de fruitione summi boni, ac supremi finis nostri, cuius causa conditi, ac redempti, atque in hanc extremam ætatem perducti sumus, quo summo bono continetur omne bonum, quo omnis noster satietur, & expleatur appetitus? Etenim Deo non conspecto, non constaret beata vita. Deus ipse vita est animæ nostræ; hic quidem in Christiana senectute per gratiam inchoatè; sed obita morte, per gloriam expletè, ac consummatè. Dicat tibi Deus, peccare vis, pecca; fac quicquid te delectat; quicquid amaueris in terra, tutum fiat. Abundent tibi (si licet aliquid Sanctissimi Patris dictis adijcere) non in terra modò, sed etiam in Cælo, non terrestria tantum, sed & Cælestia; viue in illis, non vsque ad tempus, sed semper; faciem autem meam nunquam videbis. Si amasti, ingemuisti. Ecce omni terrena, cælestique etiam fælicitate, omnibus rebus, quas concupiscere possis, abundes, circumfluant te omnis generis bona; non illa amittis, non illa deseris, quid vis amplius? Fleret & gerneret

August. in
Ps. 127.

gemeret castus timor, & sanctus amor, & diceret: Imò tollantur omnia, & faciem tuam videam; Exclamaret de psalmis: *Deus virtutum conuerse nos: & ostende faciem tuam: & salui erimus. Vnam petij à Domino, hanc requiram. Tibi dixit cor meum, exquisiuit te facies mea: faciem tuam Domine requiram.* In tuo vnus conspectu conquiescam. *Deus cordis mei, & pars mea Deus in aeternum.* Dum vtraque mentis facultate, velut extensis brachijs, intellectu ac voluntate, clarè videndo, & ardentè amando, completar, atque in te totus transformer, atque deificer: O fortunatam mortem, quæ certâ hac spe, & expectatione nitatur! O magnum senectutis solatium, beatę huius mortis appropinquatio! *In pace in idipsum dormiam, & requiescam; Quoniam tu Domine singulariter in spe constituisti me.*

Hæc habui, Perquam Reuerende Pater, quæ paucis elucubrata diebus, ad te transmitterem; communis vtriusque nostrum senectutis; quam ego quidem ingredior, tu propemodum decurristi (quamquam nullus sit senectutis terminus, & vt centesimam quoque superes ætatem, vehementer exopto) solatia atque adiumenta; quæ abs te, non sinistrè interpretanda, sed in optimam omnino partem accipienda, confido.

F I N I S.













